

Milik Departemen P dan K
Tidak diperdagangkan
Untuk umum

Hikayat Nabi Sulaiman

Ishak Peutua Gam



Departemen Pendidikan dan Kebudayaan



HIKAYAT NABI SULAIMAN

Hikayat NABI SULAIMAN

MILIK KEPUSTAKAAN
DIREKTORAT TRADISI
DITJEN NBSF DEPBUDPAR

Dikarang oleh
ISHAK PEUTUA GAM

Dialihaksarkan oleh
RAMLI HARUN

PERPUSTAKAAN
DIT. TRADISI DITJEN NBSF
DEPBUDPAR
NO. INV : 2258
PEROLEHAN :
TGL : 6-4-09
SANDI PUSTAKA :

Departemen Pendidikan dan Kebudayaan
PROYEK PENERBITAN BUKU SASTRA
INDONESIA DAN DAERAH
Jakarta 1982

Diterbitkan oleh
Proyek Penerbitan Buku Sastra
Indonesia dan Daerah

Hak pengarang dilindungi undang-undang

| | |
|----------------------------------|-------------------|
| PERPUSTAKAAN | |
| DIT. SEJARAH & NILAI TRADISIONAL | |
| Nomor Induk | : 1614/1984 |
| Tanggal terima | : 26-12-1984 |
| Seri/nadiah dari | : Proyek PBSI & A |
| No. pol. bks | : |
| Banyak | : |

KATA PENGANTAR

Bahagialah kita, bangsa Indonesia, bahwa hampir di setiap daerah di seluruh tanah air hingga kini masih tersimpan karya-karya sastra lama, yang pada hakikatnya adalah cagar budaya nasional kita. Kesemuanya itu merupakan tuangan pengalaman jiwa bangsa yang dapat dijadikan sumber penelitian bagi pembinaan dan pengembangan kebudayaan dan ilmu di segala bidang.

Karya sastra lama akan dapat memberikan khazanah ilmu pengetahuan yang beraneka macam ragamnya. Penggalian karya sastra lama yang tersebar di daerah-daerah ini, akan menghasilkan ciri-ciri khas kebudayaan daerah, yang meliputi pula pandangan hidup serta landasan falsafah yang mulia dan tinggi nilainya. Modal semacam itu, yang tersimpan dalam karya-karya sastra daerah, akhirnya akan dapat juga menunjang kekayaan sastra Indonesia pada umumnya.

Pemeliharaan, pembinaan, dan penggalian sastra daerah jelas akan besar sekali bantuannya dalam usaha kita untuk membina kebudayaan nasional pada umumnya, dan pengarahan pendidikan pada khususnya.

Saling pengertian antardaerah, yang sangat besar artinya bagi pemeliharaan kerukunan hidup antarsuku dan agama, akan dapat tercipta pula, bila sastra-sastra daerah yang termuat dalam karya-karya sastra lama itu, diterjemahkan atau diungkapkan dalam bahasa Indonesia. Dalam taraf pembangunan bangsa dewasa ini manusia-manusia Indonesia sungguh memerlukan sekali warisan rohaniah yang terkandung dalam sastra-sastra daerah itu. Kita yakin bahwa segala sesuatunya yang dapat tergali dari dalamnya tidak hanya akan berguna bagi daerah yang bersangkutan saja, melainkan juga akan dapat bermanfaat bagi seluruh bangsa Indonesia, bahkan lebih dari itu, ia akan dapat menjelma menjadi sumbangan yang khas sifatnya bagi pengembangan sastra dunia.

Sejalan dan seirama dengan pertimbangan tersebut di atas, kami sajikan pada kesempatan ini suatu karya sastra daerah Aceh, yang berasal dari Pusat Dokumentasi dan Informasi Aceh, dengan harapan semoga dapat menjadi pengisi dan pelengkap dalam usaha menciptakan minat baca dan apresiasi masyarakat kita terhadap karya sastra, yang masih dirasa sangat terbatas.

Jakarta, 1982

Proyek Penerbitan Buku Sastra
Indonesia dan Daerah

KATA PENDAHULUAN

Naskah *Hikayat Nabi Sulaiman* ini, kami peroleh dari Pusat Dokumentasi dan Informasi Aceh bulan September tahun 1981. Dikarang oleh Ishak Peutua Gam dalam huruf Arab dengan bahasa Aceh yang baik. Tebal 102 halaman dengan ukuran 20,5 X 16 cm. Tiap halaman terdiri dari dua puluh empat baris.

Pada kesempatan bertemu dengan pengarang di Meureudu tanggal 20 Juni 1982, kami mendapat penjelasan bahwa hikayat ini ditulis sekitar tahun 1964, dan merupakan karangannya yang keempat sesudah *Hikayat-hikayat Nabi Ibrahim*, *Nabi Yusuf*, dan *Nabi Musa*. *Hikayat Nabi Musa* dan *Nabi Yusuf* sudah kami alihaksarkan disertai dengan ringkasan ceritanya masing-masing tahun 1982 dan 1983.

Seperti hikayat-hikayat nabi yang lain, *Hikayat Nabi Sulaiman* juga diangkat dari kitab cerita nabi-nabi "Qasasul Anbiya". Meskipun jalan ceritanya di sana sini dibumbui dengan tambahan-tambahan dari pengarang, sebagai sebuah karya sastra hikayat ini patut juga dihargai.

Jakarta, 1982

Ramli Harun

RINGKASAN CERITA HIKAYAT NABI SULAIMAN

Dimasa Nabi Daud berkuasa, negeri Mesir dan Syam sangat makmur. Suatu ketika Nabi Daud mendapat perintah dari Tuhan untuk menetapkan salah seorang putranya menjadi pengantinya. Pilihan jatuh kepada putranya yang bungsu yaitu Sulaiman. Sulaiman diberi pakaian hikmat oleh ayahnya. Barang siapa yang memakai pakaian itu ia akan mendapat pangkat mulia dan disayangi oleh semua makhluk termasuk hewan. Sesudah Sulaiman diangkat sebagai pengantinya maka Nabi Daud pun wafat.

Nabi Sulaiman dapat menguasai segala macam bahasa termasuk bahasa hewan, dan juga amat bijaksana. Semua jenis binatang datang menghadap dan mengadu berbagai hal. Nabi Sulaiman mengangkat Asab Khaba sebagai Perdana Menterinya. Sebuah balairung tempat bersidang dibangun. Nabi Sulaiman di atas singgasananya diapit kiri kanan oleh menteri-menteri nya yang terdiri dari manusia dan jin. Sebuah balai besar dibangun pula khusus untuk menerima fakir miskin. Tiap hari seribu orang tamu di jamu disitu. Beliau sendiri ikut makan bersama mereka.

Pada suatu waktu nabi Sulaiman memerintahkan supaya di hadapan singgasananya dihampari permadani dan kursi-kursi yang indah. Sesudah semua siap anginpun datang dan menerbangkan singgasananya bersama dengan pengiringnya. Nabi Sulaiman mendengar dari burung hud-hud bahwa ada sebuah negeri bernama Saba diperintah oleh seorang Ratu bernama Balkis. Ia belum bersuami dan rakyat masih menyembah matahari. Atas jasa burung hud-hud memberi keterangan tersebut, Nabi Sulaiman memberi hadiah kepadanya berupa jambul diatas kepalanya. Hiasan kepala itu akan menjadi milik hud-hud sampai kepada anak cucunya. Kemudian Nabi Sulaiman memberi sepucuk surat kepada burung hud-hud untuk disampaikan kepada Ratu Balkis yang isinya meminta supaya Ratu ini tidak lagi

menyembah matahari. Ratu Balkis merasa terancam oleh surat Nabi Sulaiman. Ia mengirimkan dua orang menterinya beserta rombongan dengan membawa tiga karung intan berlian dan emas perak sebagai persembahan pada Nabi Sulaiman. Sampai disana perutusan Ratu Balkis kagum menyaksikan kerajaan Nabi Sulaiman. Pemberian Ratu Balkis ditolak oleh Nabi Sulaiman. Beliau hanya meminta supaya Ratu Balkis beriman kepada Tuhan Yang Maha Esa. Utusan Ratu pulang dan menceritakan se-gala yang dilihatnya. Ratu bersedia memeluk agama Islam tetapi ingin menguji Nabi Sulaiman dengan beberapa masalah.

Utusan yang dikirim Ratu pulang dan mengatakan bahwa Nabi Sulaiman dapat menjawab semua masalah yang dikemukakan oleh Ratu. Ratu Balkis heran dengan kepandaian Nabi Sulaiman lalu ia ingin bertemu sendiri.

Adapun Nabi Sulaiman telah menanyakan pada rakyatnya siapa yang dapat membawa Ratu Balkis ke negeri Syam dalam waktu singkat. Dalam waktu dua jam Asaf Khaba telah membawa Ratu Balkis bersama istananya kehadapan Nabi Sulaiman. Melihat keajaiban itu Ratu Balkis segera memeluk agama Islam. Pada hari itu juga Nabi Sulaiman melangsungkan pernikahannya dengan Ratu dari Saba itu.

Pada suatu hari Nabi Sulaiman mendapat seekor kuda berwarna hijau dari Saimud yang didapatnya dari sebuah pulau. Saimud memberitahukan Nabi Sulaiman tentang sebuah pulau yang rakyatnya masih menyembah berhala. Rajanya bernama Anggur. Putrinya disebut putri Anggur. Dengan dibawa oleh angin Rakhan, Nabi Sulaiman mendarat di pulau itu. Raja Anggur melawan dan peperangan terjadi. Raja Anggur tewas oleh hembusan angin. Nabi Sulaiman menasehati putri Anggur supaya tidak lagi menyembah berhala. Akhirnya Putri Anggur memeluk agama Islam dan menikah dengan Nabi Sulaiman. Dalam keadaan sedih karena teringat akan ayahnya yang sudah tiada, iblis datang menggoda Putri Anggur. Sebuah patung dibuat lalu diberikan kepada putri untuk disembah setiap hari. Putri menuruti bujukan iblis. Ketika Nabi Sulaiman mengetahuinya patung tersebut dibuang ke laut. Pada suatu hari seekor belalang

datang hendak mengadu halnya kepada Nabi Sulaiman. Karena putri tidak mengerti maka belalang itu ditangkapnya lalu dibakar untuk makanan.

Seorang menteri dari bangsa jin bernama Astarukhi dapat mencuri pakaian hikmat Nabi Sulaiman. Dengan pakaian itu Astarukhi dapat menduduki singgasana kerajaan. Rakyat yang datang menghadap, menyangka bahwa ia Nabi Sulaiman. Tanpa pakaian hikmat Nabi Sulaiman tidak dikenal lagi oleh rakyat termasukistrinya, malahan diusir keluar istana. Menurut suatu riwayat cincinnya juga diambil oleh Astarukhi. Nampaknya Nabi Sulaiman mendapat cobaan dari Tuhan gara-gara istrinya memakan belalang, sampai-sampai beliau bekerja sebagai nelayan dan sakit-sakitan. Akhirnya Nabi Sulaiman kawin dengan seorang anak nelayan yang kulitnya hitam, tetapi baik budi nya.

Adapun para menteri dan sahabat Nabi Sulaiman telah me ngetahui bahwa Astarukhi telah menyamar sebagai Nabi Sulaiman. Karena rahasianya telah ketahuan ia melarikan diri dan cincinnya dibuang ke laut. Cincin itu kebetulan ditelan oleh seekor ikan. Ikan itu terjala oleh ayah gadis hitam. Cincin itu diambil kembali dan sesudah dipakainya Nabi Sulaiman kembali seperti semula. Demikian pula istrinya menjadi amat cantik berkat cincin tersebut. Nabi Sulaiman kembali ke Syam bersama istrinya. Akibat perbuatannya yang salah Astarukhi dihukum 40 hari.

Sesudah menyempurnakan mesjid peninggalan ayahnya, Nabi Sulaiman wafat dengan meninggalkan seorang putra yaitu Nabi Armia.

Jakarta, 22 Nopember 1982

Ramli Harun.

**Hikayat
NABI SULAIMAN**

BISMILLAHIRRAHMANIRRAHIM

Alhamdulillah phon pujian
Hadap Tuhan Po nyang esa
Seulaweut saleuem ateueh janjongan
Sikalian keuluarga

Ateueh wareh sahabat sajan
Lheueh nibak nyan keu ulama
Doa beu le keu si mukmin
Nyang that yakin bak agama

Tulong mulong keu miseukin
Aneuk yatim tauseuha
Ya Allah Rabbul Alamin
Gata karim keukai baka

Gata sidroe kamoe yakin
Nyang that halim silama-lama
Hamba gata raya hajat
Riwayat lon keumeung rika

Neubri beutroh ban lon hajat
Beuleungkap ngon seumporeuna
Nubuet Nabi lon meung karang
Lon meung peutrang deungon basa

Nibak Jawoe lon beuet kalam
Harah lapan lon useuha
Lon peujeuet ngon basa Aceh
Mangat sareh deungon makna

Payah that bak ulon peugleh
Sang han jadeh lon useuha
'Oh lon ingat nyan keu rakan
Le that awam tuha muda

Basa Jawoe le han jeuet pham
Le that rakan tan sikula
Kaom tuha dum sinaroe
Bak meureunoe le nyang suka

Le meukeusud ngon basa droe
Meunyo Jawoe han jeuet makna
Nyan keu sabab lon seuleuah
Beuthat payah lon useuha

Soe-soe nyang na keumeung meutuah
Hamba Allah nyang bahgia
Nyang han deungo nyang biek 'asi
Biek Nasrani ngon Yahuda

Haba Sulaiman lon riwayat
Wahe sahbat ngo beurata
Soe nyang iman jeuet keu ubat
Miseue gamat ubat luka

Seureuta deungon mukjizat
Ngon deurajat lon peuhaba
Salah bacut lon pi awam
Kureueng trang didalam basa

Lon cit salah nibak lon pham
Bak bacaan pi na bida
Lom han jeuet ulon keumarang
Bak mat kalam tan biasa

Nyang biasa lon mat parang
Cangkoi ngon lham lon beulaja
Bak buet meugoe han cit tanggoh
Bak meulampoh meujan-jan na

Hana sapat nyang na sunggoh
Teubiet reuoh lon takot raya
Lon seumurat pi gohlom jeuet
Takalon kheuet bugam raya

Ujong wee han sabe tirut
Le that han jeuet ureueng baca
Hai rakan bek rayek hate
Lon cit jahe awam raya

Tan ileumee ube pade
Daok pike haru hara
Jeuet keuh ohnoe mukaddimah
Nyoel lon kisah Nabi mulia

Nabiullah phon lon kisah
Lon peugah deungo calitra
Masa Daud jeuet khalifah
Rahmat Allah dalam donya

Ureueng nanggroe kaya limpah
Hana salah isem donya
Nyan keuh sabab raseuki mudah
Khalifah ade lagoena

Nanggroe Meuse ngon nangroe Syam
Masyhuran jeueb-jeueb donya
Ujeuen sabe watee malam
Gandum gantang dum meukeuba

Hana sapeue keukurangan
Janjongan ade lagoena
Bak siuroe peurintah Rabbi
Troph Jibrai bak saidina

Ubak Daud neuba wahi
Kalam Rabbi zat nyang esa
Hai Daud peurintah Rabbi
Neuyue kheun kri ubak gata

Pileh aneuk nyang jroh budi
Gantoe diri mat neuraca
Gata Daud rab troh janji
'Izra-i rab troh bak gata

**Nabi Daud deungo meunan
Ubah yoh nyan le ie muka
Muka puteh jiek hitam
Neudeungoran maot rab ka**

**Bit pi meunan hana ugah
Hak Potallah atueuh hamba
Lom Jibra-i neuseumeugah
Hai khalifah yue Rabbana**

**Nyoe pat sineuk euncien malakat
Keu deurajat aneuk gata
Soe nyang jeuet mat tapulang leugat
Yue hadarat ubak gata**

**Nyoe pat bajee keu peukayan
Mat rijang siat le gata
Nyoe keuh bajee keubeusaran
Bak Tuhan pangkat mulia**

**Nyoe saboh beusoe Khurasani
Nyang jadi nibak neuraka
Jumbok apui beusoe beurani
Ngon poh 'asi makhluk donya**

**Tahei aneuk yue meusapat
Pileh leugat nyan keu raja
Taujoe soe nyang meutuah
Masaalah limong peukara**

**Sinan meuri bagi tuah
Nyang jeuet peugah jeuet keu raja
Na ulon ba saboh surat
Kalam ahad ubak gata**

**Limong peue kuyue surat
Soe nyang cakap jeuet keu raja
Nabi deungo meunan peureuman
Sambot rijang that mulia**

Lom Jibra-i peugah macam
Khasiet nyan euncien mulia
Baranggasoe ngui bak tangan
Ureueng nyan pangkat mulia

Makhluk donya dumjisayang
Dum hayawan jimeung seutia
Sigala cicem nyang teureubang
Jeuet keu teelan dum simua

Nyang han ikot bandum karam
Jen ngon insan dum binasa
Hana sidroe nyang krang ceukang
Jen ngon mambang dum binasa

Nyoe ceumeuti nyang leubeh kuat
Jeuet keu alat nyang seutia
Soe nyang keunong habeh hayat
Teubiet leugat lidah dua

Wie ngon uneun cabeueng lidah
Meujeureulah hu meunyala
'Oh ka habeh Jibra-i peugah
Nabiullah hei aneukda

Aneuk Nabi nyan geupeugah
Na siblaih dalam calitra
Ban siblaih droe keunan leugat
Seumbah ayah dum simua

Nyang tulot nama Sulaiman
That budiman bijaksana
Akai pi jroh pham pi tajam
Ulee kawan bak bicara

Dong meungadap sikalian
Preh kalam nibak ayahanda
Nabi Daud jatoh kalam
Aneuk badan bandum gata

Tan mubangsa bak lon tuan
Cit sapeue kheun bak dum gata
Nyoe aneuk peurintah Tuhan
Ujian nibak Rabbana

Soe jeuet peugah masaalah
Nyan khalifah gantoe hamba
Na limong peue masaalah
Soe meutuah lam le gata

Geukheun iman toh bu teumpat
Nyang teutap jimeuseuninya
Cuba kheun aneuk beuteupat
Peureuman Ahad zat nyang esa

Geukheun kuat pi pat teumpat
Lam jasad jimeuseuninya
Geukheun gaseh deungon sayang
Peugah rijang toh teumpatnya

Jawueub aneuk peureuman Tuhan
Beurimbang matan ngon makna
Geukheun malee pat beurdiam
Toh makam jimeusuninya

Cuba peugah laju beutrang
Bek meuwaham bandum gata
Geukheun akai pakri macam
Pat beurdiam ngon seuninya

Bek taiem droe aneuk teungku
Susah po du ayah gata
Bandum aneuk tan teubiet su
Han meulaku dum simua

Dua lhee go Nabi ulang
Meung sidroe tan na suara
Lom neukheun uleh janjongan
Pakon meunan bandum gata

Pakon aneuk hana kalam
Hana jeuet pham bandum gata
Siblaih gata bandum agam
Sikrak kalam hana tabuka

Got ngon jeuheut roh deungon tan
Peureuman Tuhan cit keu gata
Meunan neukheun Nabi Daud
Han soe seuot sikrak haba

Teuma beudoh aneuk tulot
Jibeuet jaroe bandua
Sulaiman yoh nyan kheun le meunoe
Meu;ah kamoe hei ayahanda

Meunyo izin ayah kamoe
Bek jeuet dudoe teumeureuka
Insya Allah ulon jaweueb
Ban meukeusud khalifah dunia

Salah beuna bahle lon beuet
Jeuet ngon han jeuet bek meudeesy
Teuma jaweueb Nabiullah
Aneuk lidah bandum gata

Ka lheueh izin nibak ayah
Jaweueb pantah hei aneukda
Sulaiman yoh nyan le seumeugah
Tanyong ayah lon useuha

Iman jiduek nibak hate
Sinan sabé rok-rok masa
Meujan-jan na jimeurabe
Jilahe bak aneuk mata

Gaseh duek bak jantong hate
Han jirabe bak keupala
Meunyo jiweh panyang paye
Gaseh hanle ngon seutia

Malee duek bak mata hate

Han jirabe bak keupala

Akai jiduek dalam utak

Sinan awak hana bida

Hana jiweh lam tangkurak

Ho nyang jijak keunan gisa

Kuat jiduek nibak tuleueng

Aurat eumpeueng ban seunlingka

Bak binatang badeukek rimueng

Meungtan tuleueng kuat hana

Nibak ulon meunan leumah

Nibak ayah saleh beuna

Nabi Daud nyang khalifah

Nekheun pantaih sangat beuna

Roh ban takheun aneuk lidah

Kheundak Allah mubahgia

Gata aneuk gantoe ayah

Uroe nyoe sah jeuet keu raja

Hei Sulaiman gaseh Allah

Ka meutuah jinoe gata

Jeuet keu raja nanggroe Makkah

Gantoe ayah mat neuraca

Nabi jok le ngon malakat

Sangat jroh that jibra-i ba

Ngon ceumeuti neujak leugat

Nyoe keu alat mat neuraca

Deungan bajee lhee meusapat

Neujok leugat keu aneukda

Sulaiman sambot yoh nyan laju

Neuseumbah du yoh nyan le sigra

Peuijazah uleh po du

Neusok laju bajee syeureuga

Neusok euncien nibak putu
Jiek laju cahya muka
Putu uneun euncien malakat
Meuleb-leb jinoe beudoh cahya

Ngon ceumeuti laju neumat
Deungon siat le mulia
Jeuet le basa sikalian
Basa alam dum sigala

Habeh jeuet basa binatang
Jen hewan margasatwa
Laju nekheun di keue ayah
Alhamdulillah pujoesa

Bak uroe nyoe lon hei ayah
Heundak Allah yang kuasa
Neubri izin ngon ijazah
Lon khuteubah bak seedara

Nabi Daud laju peugah
Ka ulon srah ubak gata
Sulaiman baca le khuteubah
Alhamdulillah phon neukata

Hei seedara hamba Allah
Ngon ijazah nibak bapa
Ngon karunia sidroe Allah
Rahmat limpah lon teurima

Basa alam dum sinaroe
Maklum kamoe dum simua
Jeuet lon jawueub dum sinaroe
Beurkat nyoe ibu bapa

Izin Tuhan keu lon sidroe
Han padok nyoe dum sigala
Lheueh khuteubah Nabi Sulaiman
Daud riwang u astana

Hajat nabi jak seumbahyang
Ngadap Tuhan Po yang esa
Ka neukek laju u manyang
Cit disinan suntok masa

Bilek manyang neukek leugat
Baro dapat rinyeuen dua
Rinyeuen lhee baro neutakat
Troph leugat Izra-i teuka

Ngon nabi laju meuhadap
Neutueng leugat le ngon nyawa
Nabi Daud laju cakap
Tapreh siat bek that kubra

Tapreh lon beutroh u teumpat
Lon ibadah seumbah esa
Izra-i jawueub le pantaih
Suroh Allah lon keuraja

Hana meunan neupeurintah
Han jeuet ubah kheun Rabbana
Meulaenkan oh tabeuet langkah
Meunan titah Tuhan esa

Nabi Daud neubet langkah
I'zra-i pantaih le tueng nyawa
Neukek rinyeuen laju reubah
Nabiullah woe bak esa

Habeh janji nibak Allah
Habeh langkah dalam donya
Troph le aneuk kanan kiri
Junjong nabi yang mulia

Hana panyang ulon kheun kri
Wafeuet nabi pujok donya
Troph le aneuk kanan kiri
Jitamong u dalam kuta

Punoh mideuen agam inong
Han peue tanyong tuha muda
Sulaiman yang bri mupeuti
Geupumandi yang mulia

Lhee lapeh kafan di Nabi
U kubu le nyan geubawa
Lheueh geukubu Nabi Daud
Uroe seupot malam teuka

Buet khanduri han lon seubut
Ban nyang patot buet aneukda
Bak riwayat tan geuseubut
Mate Daud tinggai aneukda

Le that rakyat dum seulindan
Inong agam teubinga-binga
Ho nyang jijak sang-sang sawan
Meunan macam asoe donya

Bandum ureueng han meukri ban
Seulayeue tan Nabi Mulia
Nabi Sulaiman kalon macam
Rakyat bokban tuha muda

Neukhuteubah nak bek bimbang
Bek dukaan he seedara
Ayah lon ka janji Tuhan
Janjongan ka habeh masa

Meungtagaseh wahe rakan
Bandum teelan tuha muda
Peue nyang ka na Nabi wasiet
Peubuet beubit uleh gata

Neupeulara bak buet maksiet
Lom bek takarat keu hareuta
Bri ajaran dum aneuk miet
Tapeuteubiet ngon areuta

'Oh takalon kaum meugriet
Tulong bubit uleh gata
Buet larangan bek tapandang
Beutalarang uleh gata

Han ek ngon kreueh taboh padan
Geuba akan jalan beuna
Nyan tanda gaseh keu Nabi
Ureueng faki tapeumulia

Aneuk yatim bu beutabri
Bek tacaci du seedara
Deungon jiran asoe gampong
Tulong mulong oh seungsara

Nibak Tuhan raya untong
Neupeulindong bak neuraka
Dum seedara oh teusireueng
Ta junjong peuingat sigra

Bri nasihat ngon tatulong
Bek tueng untong ngon seedara
Meunan Nabi neu khuteubah
Rakyat bahrollah seungab dumna

Han le duka keu khalifah
Gadob susah dum simua
Seunang hate keu Sulaiman
Gaseh sayang rakyat dumna

Jieu akai that budiman
Saban deungon ayahanda
Troh bak cicem yang teureubang
Meukawan keunan dum teuka

Cicem kuek beurijuek mambang
Kleueng deungon ngang siwah raja
Badeuek gajah glueh ngon kijang
Biek beuruang rimueng singa

Kala limpeuen uleue pisan
Meukeukawan seupot donya
Maseng-maseng mupasukan
Dong meukawan atueh donya

Bangsa pari deungon mambang
Meusajan ngon afrit pi na
Dong meureuntang ban siseun klet
Ka meuapet kuta raja

Punoh mideuen ka meusak-sak
Yang teungoh jak han ek hingga
Biek cong kayee himbe ngon wak
Yang that cabak lutong kangka

Dong meuseuh-seuh meuteuratak
Maseng awak dong mubanja
Oh takalon that meusigak
Biek biyawak habeh teuka

Bandum teudong jroh meuriti
Hadap Nabi dum sigala
Yang di ateueh pi saboh kri
Cicem nuri ngon cempala

Cicem ukap ngon beuragoe
Jidong rab toe ngon anbia
Jeuet keu payong yang di manyang
Meukawan cicem dum teuka

Jipeutudong po janjongan
Suroh Tuhan zat yang esa
Matauroe hana le trang
Hana lapang cicem rimba

Dum mulia Nabi Sulaiman
Gaseh Tuhan atueh donya
Keue ngon likot ngon hadapan
Jen ngon insan peunoh donya

Nabi Sulaiman nyan yang sujud
Ubak makbud neumeungaza
Ya Allah gata yang ujud
Ban makeusud atueuh hamba

Ban nyang kheundak hamba neunyoe
Syuko kamoe ya Rabbana
Rahmat peunoh atueuh lon nyoe
Gata sidroe that kuasa

Nabi sujud tujoh kali
Seurah diri ubak zat esa
Bak Sulaiman datang wahi
Jibra-i keunan troh teuka

Hai Sulaiman titah Rabbi
Asoe bumi asoe rimba
Jen ngon hewan milik Rabbi
Keumari jak ngadap gata

Tabri hukum ngon mupeuti
Peue keuheundaki jimeungpinta
Bak masa nyan raja Sulaiman
Titah Tuhan junjong dumna

Phon neupileh bangsa insan
Bri aturan maseng jeumba
Neuboh meuntroe deungon juhan
Aturan ban adat donya

Neuhato ngon panglima prang
Urusan diateueh tantra
Asaf Khaba jeuet keu meuntroe
Peurintah nanggroe dum sigala

Peuet droe jeuet keu meuntroe.
Asaf sidroe keu peurdana
Dua insan kanan kiri
Astaruhi saboh raja

Jak di likot dijih geubri
Bangsa a'si sukee pi na
Deungon leugeh jijak kiri
Biek Habsyi hitam sukla

Wie ngon uneun bangsa insan
Dihadapan raja-raja
Neuhato lua ngon dalam
Oh na sidang bandum beuna

Lheueh neuhato sikalian
Bak hewan neupareksa
Ka neutanyong bak binatang
Hai hewan peue na cinta

Kueu bandum keunoe datang
Peue habaran keumeung buka
Teuma seuot peulandok kance
Ya Habibi ya Maulana

Bangsa kamoe le that mate
Jeueb sagoenyoem rimueng seuba
Sangat susah dum kamoe gle
Payang paye jeueb beuluka

Han jeuet meujak mita raseuki
Peutang pagi jienanya
Rimueng deungo kheun peulandok
Ka jitundok malee mata

Rimueng singa ka leumah brok
Jitob ngon ok mata dua
Lom meungadu bue ngon himbee
Hai panghulee meukuta donya

Lhee boh bangsa sangat lahee
Sangat jithee droe jih teuga
Rimueng singa lhee ngon cagee
Tiep-tiep watee kamoe jiseuba

Beuthat kamoe dicong kayee
Han jan meuthee ka jiseuba
Jiduek diyub jiyue kayee
Beuji teumee kamoe dumna

Bak mita ie pi jiteumee
Peue geulakee kamoe dum na
Dalam thon nyoe troh meuribee
Nyang ka padee kamoe bui kra

Watee malam pi jitipee
Yub kayee teubleut mata
'Oh rot kamoe ka jimakeuen
Pruet jih cateueng geunap masa

Ka jeuet jih keu raja huteuen
Peue meuteumeung ka jiseuba
Jipike droe han soe linteueng
Hana soe kheun jih kuasa

Nyan keuh kamoe mumeungadu
Neuboh laju raja rimba
Nabi deungo meunan laku
Ka teupaku siklep mata

Neukeumeung tham hana ilah
Jih nyan sah makanan singa
Meulangga watee neupeugah
Nabiullah meunan bicara

'Oh neuingat bue ngon reugkah
Nabiullah inseueh teuka
Kularang bacut kuteugah
Bek that juah rimueng singa

Bak masa nyan Nabiullah
Tanyong pantaih ubak singa
Bek seungaja jih kajak syet
Nyang teukeujot jeuet ka seuba

Bek biasa jih kapajoh
Tikoh-tikoh jeuet ka seuba
Lam-lam laot beuna kabloh
Yee ngon paoh jeuet kamita

Lagee kukheun bek kaubah
Meunyo salah kuenanya
Nabi tanyong bak blah biyah
Bangsa toh kah jeuet keu raja

Toh nyang suka cuba peugah
Nyং ek bantah dum sigala
Ka jiseuot sukee gajah
Ampon meu'ah ya Maulana

Kaom kamoe nyang ek bantah
Keu khalifah peugang rimba
Ek meularang asoe huteuen
Badeuek rimueng ek meulangka

Tangileng ngo nyan gajah kheun
Ka jilinteueng kamoe dum na
Ya Habibi meunyo gajah
Keu khalifah tan kuasa

Beuthat raya kamoe teugah
Gaduh ilah 'oh meukoh pha
Jawueub bangsa singa rimueng
Bah huteuen kamoe keu raja

Bangsa laen ek kamoe theun
Dum reuen mareuen kamoe sangga
Peulandok ngo narit rimueng
Laju jikheun bak anbia

Jih patot that po janjongan
Mangat rijang pruet jiraba
Bah tinggai jih laen hilang
Jisimpan sigala bangsa

Salang goh jeuet keu panghulee
Habeh padee dum jiseuba
Hingga seuot jeueb-jeueb kawan
Keunong sagang dum sigala

Sigala kisah bandum neutham
Na alasan dum simua
Nabi deungo meunan macam
Beurbantahan dum simua

Bak peulandok ka neusudi
Cuba kheun kri soe keu raja
Peulandok kheun ya Habibi
Leubeh ahli ya Maulana

Soe nyang suka bak Habibi
Ikot kami han meulangga
Nabi deungo narit kance
Neupeugah le bak sigala

Laju neukheun bak asoe gle
Ngo beusare tuha muda
Bek meulikot beurhadapan
Nyang tan datang ka peuhaba

Peugah bak ngon nyang tan datang
Jinoe musang jeuet keu raja
Jeuet keu raja biek meujanggot
Bangsa pulot keu peurdana

Baranggasoe nyang han ikot
Kukoh atot rimueng singa
Nabi tunyok yoh nyan leugat
Bak daulat nyan keu raja

Jeuet keu waki bangsa kance
Sigala gle jih kuasa
Soe han deungo haba kance
Kuruge ban dua mata

Kukoh jaroe deungon gaki
Kupeukeuji nibak bangsa
Keu panglima jaga huteuen
Sukee rimueng deungon singa

Lhee ngon cagee jaga huteuen
Dum reuen-mareuen bek inanya
Peue yang salah kheun bak waki
Jih keuh nyang bri ubak raja

Keu keupala badeuk gajah
Di yub khalifah jih panglima
Jak woe bandum bek le susah
Soe mabantah jak bak raja

Meunan neukheun le khalifah
Himbee reungkah yoh nyan gisa
Dum hewan han le susah
Na khalifah yang kuasa

Bak aron timoh di pasi
Balum bidi di kuala
Bangsa cicem pi neucaci
Ubak Nabi jibeurkata

Bangsa tulo deungon miriek
Bangsa beureukiek ngon cempala
Ubak Nabi bandum jiklik
Putik ngon syik jibeurkata

Ya habibi bri keukamoe
Bak uroe nyoe kamoe pinta
Sangat susah bandum kamoe
Pat keu jinoe kamoe raja

Ka jipajoh tiep-tiep uroe
Dum na kamoe le seurafa
Musem meu'ue kamoe toh boh
Umpung jroh-jroh meuusaha

Siat cre kamoe di rumoh
Hana le boh ka jiseuba
Watee muwoe umpung ka soh
Lom jireuloh jipriek dua

Rugoe kamoe han peue teuoh
Boh meugadah geunap masa
Tiep-tiep musem kamoe muboh
Lam umpung soh aneuk hana

Kamoe-kamoe oh jiteumee
Jiwiet-wiet lhee ka jiseuba
Jiwiet takue jilueh bulee
Ngon gukee ji culek mata

Nabi tanyong soe yang meunan
Jaweueb rijang nyan cempala
Ya habibi po junjongan
Yang buet meunan silama-lama

Got-got ngon kleueng gukee panyang
Ak-ak hitam ngon siwah raja
Nabi tanyong yoh masa nyan
Bit nyo meunan kah sigala

Hai kleueng leubui got-got mirah
Pakon kah sangat angkara
Boh gob ka'uet umpung kaplah
Jeuet that kah buet meulingga

Pakon meunan buatan di kah
Buet that salah ka keurija
Patot-patot kapajoh boh
Umpung soh bek kapeucidra

Watee laen oh tan reuloh
Jeuet jitoh boh lagee nyang ka
Cuba seuot yoh goh kupoh
Yoh goh reuloh muka-muka
Got-got ngon kleueng laju peugah

Raja siwah yue bak hamba
Bak kamoe meunan jititah
Hana salah kamoe dua

Nabi tanyong ubak siwah
Cuba peugah nyang sibeuna
Na kayue nyang meunan macam
Peugah rijang hai ceulaka

Siwah seuot ban plah bangkang
Na jonjongan lon peuhaba
Keupeue kayue meunan macam
Peulanggaran kakeurija

Peue keuh nyan kon peuneujeued Tuhan
Cuba kheun ban bek binasa
Bangsa ubit han kapandang
Han kasayang ube seuma

Siwah seuot laju rijang
Meunoe macam jibeukata
Ampon meu 'ah po jonjongan
That meusayang dum simua

ya habibi ya Sulaiman
Lhee bangsa nyan that ceulaka
Miriek tulo lhee ngon balam
Areuta insan dum jiseuba

Han jeuet kuneng pade di blang
Jipeureulan bunga-bunga
Hana jipreh 'oh got masak
Jilantak yoh mantong muda

Jipajoh asoe kulet jisipak
Hana layak jikeurija
Po areuta kah nyang pajoh
Jeuet keu kiroh kah meudawa

Nyang po areuta hana kiroh
Kah nyang pajoh le peue haba

Nyang salah gob kah paduli
Salah diri han kakira

Di jih jicok cit meungpade
Di kah karabe manok dum na
Hana lagoe leuek jak pike
Jinoe bek le meunan rupa

Meung ku deungo meunan sabe
Kupeucr-e gaki ban dua
Teuma jikheun le peureuleng
Soe nyang laen ka jibungka

Ya habibi ka meulaen
Sangat meusyen nyan keu raja
Meungtan raja sabe susah
Han pat peugah 'oh binasa

Lom neujaweweub Nabiullah
Soe raja kah kakheun sigra
Nyang ek lawan jan mabantah
Peulara kah dum simua

Seuot jampok nibak sage
Ampon kamoe ya maulana
Patot raja bangsa kamoe
Alam nyoe ek meukuasa

Bangsa laen kureueng cakap
Nibak adat muphom hana
Bangsa kamoe cukop leungkap
Hana sapat jeuet keu ceudra

Aneuk ulon na si urat
Sangat hibat ya maulana
Di cempala deungo meunan
Jipo yoh nyan lingka-lingka

Peureuleng jiireng sajan
Di hadapan jilila-lila
Troh beurijuek ngon siwah blang
Jicoh yoh nyan le lam mata

Jilot bulee jampok suang
Habeh leukang bulee mata
Han ek jitheun jiteureubang
Lam awan jak meuseunia

Jijak som droe biek jampok le
Narit ganje jikeulua
Teuma neukheun uleh Nabi
Bek kiroh le dum simua

Cicem ukab jeued keu duli
Jeued keu meuntri got-got rimba
Mirapati jeued keu waki
Sigala be jih kuasa

'Oh jideungo kata Nabi
Mangat hate dum sigala
Lakee izin jih keumbali
'Oh noe lanti saboh haba

Bak punteuet timoh lam blang
Bak keutapang bineh pasi
Haba nyoe 'oh noe ka simpan
Laen ban jinoe lon rawi

AMMA BAKDU phon mulaan
Raja Sulaiman ulon kheun kri
Bak siuroe po janjongan
Duek seumayam cong kurusi

Wie ngon uneun ulee balang
Panglima prang ahli-ahli
Sirot uneun bangsa insan
Di hadapan raja duli

Nyang dilikot biek bangsa jen
Cit diireng peutang pagi
Peunoh taeu ban sikeulileng
Maseng-maseng cong kurusi

Teuma Nabi neumeusabda
Bak sigala meuntroe wazi
Neuyue peugot bale raya
Teumpat tahta watee hari

Bak duek sidang hukom rakyat
Luah pi that hana sakri
Neuyue peugot ngon istana
Rumoh raya siribee biji

Peurumoh Nabi nyan sireutoh
Hu seumeuloh dum meulambi
Bandum putroe bangsa tanggoh
Nanggroe jeuoh sama sikali

Meuligoe jroh ie meuh jiboh
Deuh u jeuoh cahya han sakri
Sidroe putroe na gunangan
Siribee nyan biek abeudi

Di leuen meuligoe geupula kayee
Keunong lagee dum geulhang-li
Bak meureujan nyan keuh kayee
Nyang mangat bee bak kasturi

Kurusи meuh lhee blaih ribee
Jan pangulee duek beureunti
Laen lon kurusi pirak
Peuet teuratak meuh geuseundi

Soe nyang kalon hate galak
Meungka tajak pueh keumbali
Nyang dikeue nabi Sulaiman
Punca kulam sama sikali

Meutatah meuh sikalian
Meugeurawang kanan kiri
Peurmadani keu hamparan
Jroh analan teumpat Nabi

Duek ret uneuen meuntroe Hayat
Ret wie meuhat nan Hayati
Bandua nyan sabe pangkat
Carong pi that han peue kheun kri

Biek afrit di likot that
Nan ji meuhat Astarukhi
Laen nibak nyan han ek hisab
Le that daulat duek meuhantri

Bani isra'i yang tinggi that
Dum keurabat sukee Nabi
Nabi Sulaiman oh duek sidang
Ngui peukayan bajee paki

Bak ulee palet suruban
Ija bujang miseue haji
Meunan sabe beurang kajan
Keurajaan nyan di Nabi

Mahkota meuh tatah intan
Ateueh suruban dum neulhang-li
Ok neupanyang neuboh tudong
Yang pupayong cicem nuri

Sigala cicem dum meuhimpon
Jipeutudong atueuh Nabi
Watee neujak neubeurjalan
Angen rakhan yang peulari

Bandum tantra jipeureubang
Meusajan deungon meuligi
Ureueng yang duek that sukaan
Siulahan dalam mimpi

Jiteureubang hana that manyang
Oh seudang takalon bumi
Sang-sang tangtieng dalam ayon
Meukeut meutren sang geudodi

Soe yang rasa nyum tatre
Bee pi harom hana sakri
Kaya Allah ya gafuron
Kadirun muridum ban kheundaki

Oh troh watee Nabi neutren
Meuhimpon ngon meuntri-meuntri
Tiep-tiep suboh neuseumbahyang
Beurang kajan neupeureugi

U baitullah neubeurjalan
Angen rakhan yang ba Nabi
Neupajoh bu watee asa
Meunan yang ka tiep-tiep hari

Ka neuhato meunan jeumba
Han jeuet lupa keumupeuti
Oh lheueh makeuen watee asa
Seumbah lanja zat ilahi

Lheueh seumbahyang neujak meuen
Mita angen yang juhari
Lam sibuleuen sigo meuen
Meunan ingin nyan di Nabi

Mita ie di dalam bumoe
Jiikot nyoe Nabi peureugi
Sidroe-droe jen yang kreueh gigoe
Han ji peutoe sajan Nabi

Hana izin bak Sulaiman
Neuhantam deungon ceumeuti
Meung ka keunong ceumeuti nyan
Hanco sinan jeuet keu bumi

Bak si uroe Nabi titah
Peuget dayah teumpat faki
Teumpat zahid seumbah Allah
Sangat luah neupeudiri

Neuyue ato batee khirah
Cahya limpah peutang pagi
Neukueh kulam neuyue tatah
Jalan indah kanan kiri

Neusie keubeue geunap uroe
Peujamee nyoe ureueng faki
Siribee boh tiep-tiep uroe
Meunan bagoe buatan Nabi

Keu makanan bandum apam
Uroe malam tet kuali
Sidroe ureueng saboh apam
Beurangkajan hak ka neubri

Di Nabi pih saboh apam
Watee makan sajan faki
Neujak bak Baitul Mukaddis
Cit meujih keunan peureugi

Mita faki sinoe sideh
Yang leuteh neubri khanduri
Meunggoh dapat faki sidroe
Gohлом nyoe neumakeuen Nabi

Meunankeueh buet geunap uroe
Mita keudroe geunap hari
Watee lheueh pajoh makanan
Do'a sajan le beugini

Ya Tuhanku Rabburrahman
Rahmat sajan dua kami
Di faki jibuka tangan
Amin sajan le jikheun kri

Habeh do'a Nabi Sulaiman
Rahop yoh nyan muka diri
Nabi kheun ubak faki nyan
Ulon tuan beutatukri

Meunyo yue lon duek ateueh tahta

Jeuet keu raja lon hai faki
Oh lon teubiet nibak tahta
Ka jeuet hamba nyan keu faki

Sabe pangkat deungon gata
Yang saba ilahi rabbi
Meunan kheun Nabi Sulaiman
Oh nan kalam nyan di Nabi

Bak si uroe po jonjongan
Tron peureuman nibak rabbi
Na kadeungo aneuk Daud
Nyang kuseubut ka indahi

Bek na sagai ka peuleupah
Beukatakot peutang pagi
Kee Tuhan ureueng peujeuet kah
Rahmat limpah sabe kubri

Di donya kon ku peuindah
Ku papah peutang ngon pagi
Dalam donya ku pumeugah
Hamba Allah nak jieu kri

Meunan peureuman bak hadarat
Syuko leugat yoh nyan Nabi
Teuma dudoe Nabi peurintah
Bak kafilah ka neukheun kri

Peurmadani hijo mirah
Leueng beubagah ngon kurusi
Kurusи meuh deungon pirak
Hu mubhak-bhak hana sakri

Ubak Asap nyan neupihak
Sangat bijak meuntroe Nabi
Jiato jroh meuteuratak
Jeuet tajak ta ulee ili

Hase cukop sikalian

Duek seumanyam yoh nyan Nabi
Wie gon uneun uleebalang
Meusajan ngon meuntroe wazi

Meuntroe Asaf-duek di kanan
Nyang sabaran nyan keuh meuntri
Aneuk Khaba bangsa insan
That bijakan hana sakri

Nyang duek rot wie meuntroe Jian
That beusaran pangkat tinggi
Meuseueh-seueh got teupat banja
Raja-raja sama sikali

Meuploh ribee raja-raja
Nyang mulia sajan Nabi
Sigala jen duek di likot
Biek meujanggot duek lam tuwi

Astarukhi panyang janggot
Ngon itam lot sang ngeue api
Di ateueh cicem meukawan
Bandum nyan peupayong Nabi

Hana bacut pi na lapang
Angin datang nyan di bumi
Angen angkat bandum tandra
Keu udara jipeunari

Meuploh ribee raja-raja
Dalam hawa duek beurheunti
Bani Israil dum sigala
Ureueng nyang kha nibak Nabi

Su meudeungong 'oh angen ba
Meusuara deuh u bumi
Beurtasbeh malaikat
Su raya that tango bunyi

Peunoh langet malaikat
Karonya zat Maha tinggi
Peue geukheun le malaikat
Mulia that Potallah bri

Aneuk Daud raya pangkat
Karonya zat nyang that suci
Padum raja nyang sudahan
Hana meunan Tuhan neubri

Ngon Sulaiman hana saban
Muliaan atueh bumi
Hai Israil sikalian
Nyan kapandang buatan Rabbi

Takalon kuasa Tuhan
Keu Sulaiman Po teubri
Lagee neubri nyan keu Adam
Muliaan leubeh tinggi

Seubab salah murkaan
Ka neubuang lheueh u bumi
Ngon sikeujab Tuhan balek
Miseue parek jeuet keu tuwi

Gadob carong ngon ceureudek
Gadob lisek ngon Ilahi
Lisek ceureudek sabe insan
Deungon Tuhan bek le cakri

Nabi Sulaiman deungo kalam
Bak Tuhan neusujud diri
Ka neuseurah diri bak Rabbana
Nyang kuasa langet bumi

Ya Allah Wahidul Kahhar
Sidroe gata nyang that gani
Ateueh ulon rahmat gata
Syuko hamba nyang abdi

Meunan neukheun Nabi Mulia

Di udara teungoh peureugi
Masa teungoh angen bawa
Ngon tandra sama sikali

Teuma neukheun Nabi mulia
Bak angen ba neupeugah kri
He Rakhan peutron u donya
Hajat hamba seumbah Rabbi

Angen peutron le u bumoe
Dum sinaroe tandra Nabi
U donya gohлом cit sampoe
Sidom bumoe lon peugah kri

Teungoh tron tandra Sulaiman
Saboh kawan sidom bumi
Saboh raja dalam kawan
Nan raja nyan Bandahari

Ka jibri thee ubak rakan
Wahe teelan sama sikali
Peusiblah droe wahe teelan
Tandra Sulaiman tron u bumi

Lob lam umpung dum sibarang
Bek jigidong tandra ili
Tandra hana jiseungaja
Bek binasa bak jititi

Meunan jikheun raja sidom
Ka teuceungong yoh nyan Nabi
Neungo jimirit keunong bangon
Ka neutanyong ueh Nabi

Teupike Nabi Sulaiman
That jisayang bangsa diri
Salang sidom dum nan macam
Nyang insan hana beugini

Bangsa droe nyang that jikuran

Tan salahan pi jicaci

Cit jipeuna ngon alasan

Mita jalan tiep-tiep hari

Na bacut tuto leupasan

Ngon nyan jidam jipoh mate

Hana inseueh sikalian

Jipeukaram disinan le

Kon salah buet salah tuto

Teulanjo leumo rot pade

Roh jipeugah bak ureueng le

Nyang beuhe ka saket hate

Meunyo han ek jipoh keudroe

Jisiboe ureueng nyang jahe

Jipeusuna sabe keudroe

Buet saboh roe dum jicungke

Han jeuet meudeh peugot meunoe

Aduen adoe han jipike

Nyang di aduen jipoh adoe

Jeuet keu rugoe han jipike

Meungna jieu leubeh nekmat

Jikhianat le jigule

Hareuta gob that jiminat

Han jiingat droe jih mate

Han jitakot le keu Tuhan

Bak jipham jih han mate

Nyoe di sidom dum noe macam

Keu rakan got that jipike

Ka got sidom deungon insan

Keu Tuhan jitakot kon le

Raja sidom that meubudoe

Keu rakan droe leubeh jipike

Bak masa nyan Nabi Sulaiman

Beurkataan ngon sidom le

Na kadeungo he 'Areujan

Seudiaan that meusampe

That geugaseh nyan keu rakan

Sangat hiran lon bukon le

Kah nyan sidom dum nan macam

Bangsa insan le that jahe

Peue sabab got that ka sayang

Meungrakan keupeue kah pike

Jiseuot le raja Areujan

Hei jonjongan nak bek mate

Ngon aneuk sayang keu rakan

Sidroe-droe han dapat le

Meungroh gadoh ureueng tuha

Got silaksa laen mate

Han meurumpok budi basa

Payah mita jeueb lungkiek gle

Walee jeuheut lom seedara

Taaja soe panyang syawe

Sigo salah nyan seedara

'Oh na dua beutapike

'Oh troh lhee go hana ubah

Tapeusalah bek cit mate

Akai jih beu ek taubah

Beu that payah beu tapike

Meunyo saket di lon rakan

Sang-sang badan lon ka reule

Meunyo mate han peue kheun ban

Sang beusajan kamoe ile

Nabi Sulaiman lon teumanyong

Kheun beu keunong bak ulon le

Tandra gata baroh tunong
Dum na tamon bak tapike
Padum na le nyang keupala
Cuba kata awai akhe

Raja sidom jaweueb lanja
Hai baginda panyot kande
Sadum-sadum ngon maulana
Kureueng hana meung si pade

Nabi Sulaiman neubeurkata
That bahgia raja ini
Rahmat Tuhan wahe raja
Dudoe gata pangkat tinggi

Di donya gata seulamat
U akhirat leubeh lagi
Nabi Sulaiman 'oh nan cakap
Lheueh nyan leugat pujoe Rabbi

Neuseumbahyang dua rakaat
Riwang leugat neukeumbali
Nabi neuwoe u istana
Padum lama di meuligi

'Oh ka uroe neukeulua
Duek bak tahta hukom diri
Lheueh hukom droe hukom rakyat
Meunan adat tiep-tiep hari

Kon gob mantong nyang neusasat
Leubeh brat neuhukom diri
Jingadap le huleebalang
Meuntroe sajan kanan kiri

Di ateueh cicem teureubang
Jipawang nyan sidroe Nabi
Deuh bak Nabi sipat lapang
Bubayang nyata u bumi

Tok-tok beuragoe hana datang
Ka lapang atueh Nabi
Matauroe keunan ka trang
Jonjongan yoh nyan neusudi

Hai Ukab peue sabab lapang
Pane kawan tan keumari
Meuntroe Ukab jaweueb rijang
Beuragoe tan keunoe peureugi

Beuragoe hana troh teuka
Keumana saleh peureugi
Nabi deungo meunan haba
Neukheun lanja cuba cari

Beuragoe nyan darohaka
Kubri jeumba oh keumbali
Ku azeb watee jigisa
Izin hana jipeureugi

Soe na kalon ho jibungka
Ngon seungaja jih jilari
Ku seumbeulih watee jiwoe
Bulee di asoe jih kulili

Kulot bulee tinggai asoe
Kuyue peutroe sidom ili
Hai Ukab cuba pariksa
Ho jibungka ngon peureugi

Ukab deungo kheun anbia
Jipo sigra jijak cari
Jiseutot le dalam hawa
Ka jimita ulee-ili

Leumah jieu dalam miga
Teungoh gisa jikeumbali
Teungoh jiwoe jarak raya
Saboh donya jipeureugi

Meurumpok laju ngon Ukab
Jidhot leugat le beugini
Hai beuragoe nyang that bangsat
Ka beurangkat han kakheun kri

Habeh kamoe dum keunong drab
Kah nyang jungkat gob katadi
'Oh kawoe ingat beuhabeh
Geuseumbeuleh uleh Nabi

Geupeucre bre wali wareh
Geusie beuteh deungon gigi
Nabi kheun keumeung koh bulee
Mangat kathee salah lari

Beuragoe jaweueb le meupre
Buatan kee bek tapaduli
Tiep-tiep Nabi pangkat leubeh
Saboh bijeh koh keu buni

Han tom gob na geupeudaleh
Nyang geukoh kreh kameng gasi
Gohlom geupoh sidroe ureueng
Di phon jameun hingga ini

Nabi kon langhuda seuekeuem
Nyang geugantung biek pancuri
Nibak lon hana peue takheun
Nabi bandum cit geupuji

Nibak ulon han peue takheun
Ka kumaklum buatan Nabi
Tiep-tiep Nabi han tom geuceula
Lam geupula saban hari

Meulaenkan bangsa Nasara
Seumbah Budha nyang jibanci
Meunan kheun cicem beuragoe
Laju jiwoe ubak Nabi

Ji meugadap laju sidroe

Ulee nyoe tundok u bumi
Ban dua blah sayeuep keumang
Sujud yoh nyan ubak gaki

Nabi tanyong yoh masa nyan
Peue sabab han kah keumari
Baroe keunoe kah tan datang
Ho beurjalan kah peureugi

Watee kajak han kakheun ban
Ka lapang bak kah beurdiri
Soe bri izin kah beurjalan
Kakheun rijang bek kutadi

Beuragoe jaweueb le rijang
Ya jonjongan salah kami
Kareuna lon ulon salah
Lon aku sah hai ya saidi

Ateueh beuna lon han salah
Oh lon peugah baro meukri
Bak lon meuen angen pi draih
Lon ji kipah laen nanggri

Han ek lalu angen bagah
Rab meukilah dua gaki
Oh han ek lon mitailah
Turot bagah angen lari

Ho nyang jiba lon layang droe
Laen nanggroe jatoh kami
Nabi tanyong pakri bagoe
Cuba kheun proe ka peureugi

Ya habibi ya maulana
Salah hamba neupeugah kri
Peue balah u ateueh hamba
Neukheun raya ube guni

Peue han ampon ya maulana
Teebat hamba meuribee kali
Jaweueb Nabi nyang mulia
Salah raya peue kasudi

Salah ka jinoe kuseksa
Kubri bala kreueh sikali
Ku azeueb lhee macam seksa
Nyang peurtama kah kubuni

Kupeucré ngon keuluarga
Kuyue tampa ubak nuri
Kuyue coh bak cicempala
Lam mata kuboh ie campli

Nyang keudua kubet bulee
Ku adee bak matahari
Bah sidom lueh bak-bak ulee
Kuboh abee jeueb-jeueb seundi

Teuma nyang lhee kuseumbeulih
Dua gateh kutiek lam apui
Kuyue pajoh bak mie puteh
Kuyue kreh bak sidom apui

Kuyue peudeuk bah laparan
Dum makanan han kubri-bri
Beuragoe ngo kheun jonjongan
Jikheun yoh nyan ubak Nabi

Buatan ulon sikalian
Nyang salahana ka teukeudi
Sabab lupa jeuet keu salah
Sinan ubah sigala janji

Hana ureueng tem keu salah
Cit keu meugah dum geucari
Hana ureueng yang tem keu cut
Si burut ngon raya gaki

Tapeugah jih nyang tem keu cut
Takalon buet leubeh tari
Cuba kalon ya maulana
Nyang raya pha leubeh tari

Hana jithee droe raya pha
Bak jisangka jroh sikali
Tan jitupeue gob upat ceula
Tuha muda di jih geucari

Sidroe jih jeuet raya pha
Silab raya bak peureugi
Sabab jibloh dalam paya
Ka jiputa le jen 'asi

Nyan kon salah ya maulana
Sabab paya raya gaki
Sabab tuwo deungon lupa
Nyoe pi hamba hai ya saidi

Bak ureueng ngeut trang bit salah
Bak khalifah gohlom meukri
Teuma marit Nabiullah
Cuba peugah hai kah tadi

Meunyo angen geureutok kah
Ho dairah kapeureugi
Ampon maaf ya maulana
Bak angen ba jatoh kami

Srot ulon bak saboh nanggroe
Nanggroe Saba' nan geurasi
Lon eu nanggroe jroh lagoena
Hana nyang sa atueuh bumi

Raja sinan ureueng binoe
Rupa nyoe sang bintang pari
Tan seunaleuek lam nanggroe nyoe
Sang bagoe budiadari

Watee jijak lam meuligoe
Cahya sampoe jih u bumi
Beulukeh nama cut putroe
Jimat nanggroe ulee ili

Umu ka troh goh na lakoe
Fie budoe pi teurpuji
Salah bacut bungong geutoe
Nyang jipujoe matahari

Nyan keuh sinan nyang that rugoe
Kameupaloe tuan siti
Nanggroe nyan cit nanggroe maksiet
Tan teugeutip kaum Nabi

Tuha muda bah aneuk miet
Jiyakin bit matahari
Matauroe jikheun Tuhan
Uroe malam nyan jipiji

Nabi deungo meunan macam
Neukheun rijang lom beugini
Peu haba kah keubeunaran
Jikheun Tuhan matahari

Pakri kathee ngon katuban
Ka kapandang buatan siti
Beuragoe kheun keubeunaran
Lon beuklam sinan beureunti

Lon kalon buet putroe bintang
Watee siang seumbah siti
'Oh leumah matauroe
Cut putroe ngadap beurdiri

Deungon rakyat dum sinaroe
Jak ngadap nyoe tiep-tiep pagi
'Oh lheueh seumbah dum meuwoe-woe
Bak teumpat droe sama sikali

Nabi deungo meunan bagoe

Neusujud droe ubak Rabbi

Tujuh kali Nabi sujud

Meurubuet lam hate Nabi

Nanggroe nyan ulon seurubuet

Han got sifeuet seumbah hari

Han jituri Tuhan makbud

Nyang maujud Ilahi Rabbi

Bak beuragoe Nabi jawueub

Han got sifeuet putroe siti

Meunyo beuna nyang kapeugah

Insya Allah ulon ungki

Beuragoe cicem neutuah

Jiseumbah bak gaki Nabi

Seureuta ngon jimeusumpah

Deumi Allah peujeuet kami

Ube lon eu ulon peugah

Lon pandang sah buatan siti

Keuhai ulon nibak salah

Ulon seurah bak kaom Nabi

Lon harap bek jeuet keu salah

Beuek meuah bak takeudi

Hai beuragoe buet kah salah

Kupeumeuah sama sikali

Kuapus bandum nyang salah

Nyang kapeugah kumeungbuni

Lom beuragoe jikheun meunoe

Ampo kamoe ya habibi

Nibak salah ka seuleusoe

Upah kamoe jinoe neubri

Upah lon jak deungon lon woe

Upah kheun proe ubak Nabi

Nabi deungo kheun beuragoe
Peurab keunoe rab ngon kami
Upah kah kubri uroe nyoe
Pakri bagoe nyang kah cari

Ya habibi droe neuh maklum
Beujeuet jitueng cuco kami
Nabi deungo meunan jikheun
Ka neumaklum jikheundaki

Ka neubri alat keurajeuen
Nyoe katueng beugot paduli
Nabi kheun boh katheun ulee
Nyang kalakee dong beurdiri

Beuragoe laju theun ulee
Nyum meuribee neuboh tupi
Nyoe pusaka kubri keu kah
Keu khalifah dilikot kami

Sigala cicem dum hukom kah
Jeueb dairah kah keu duli
Troh bak cuco hana ubah
Nyan kupiah tanda bukeuti

Cicem laen teuhah babah
Ureueng salah jinoe tinggi
Maseng-maseng jimeusah-sah
nabiullah baek budi

Beuragoe jinoe meutuah
Jikhalfah ulee ili
Teuma Nabi lom neupeugah
Kuharap kah lom peureugi

Jinoe kame saboh surat
Ubak deelat raja putri
Yoh nyan Nabi peugot surat
Haba jroh that hana sakri

Seureuta ngon muslihat

Neubri adat raja putri

Surat nyoe nibak Sulawesi

Di nanggroe Syam troh keumari

Nyoe keuh Nabi peusuroh Tuhan

Nyang po alam amat tinggi

Nyang peujeuet sigala alam

Jen ngon insan ateuh bumi

Meudapat keu putroe bintang

Nyang meugahan nyang teurpuji

Di nanggroe Saba' keurajaan

Hai Sulotan nyang beurbudi

Hai pocut bungong keunarang

Harapan datang ubak kami

Sayang gata cut meusubang

'Oh lon pandang hana meukri

Bek pocut taseumbah uroe

Jih nyan sidroe teuma fani

Han ek jibri keu geutanyoe

Jih sidroe peuneujeuet Rabbi

Seumbah Allah Tuhan makbud

hase meukeusud ban hajati

Allah Tuhan nyang na maujud

Nyang lanjut teudong beurdiri

Neupeuhudep dum geutanyoe

Dum sinaroe na raseuki

Neukuasa langet bumoe

Pandang putroe langet bumi

Neupeumate ngon peuhudep

Neupeuayeb neupeukeuji

Neupeuayeb mangat deungon saket

That ajaeb buet ilahi

Gata ~~pe~~jeuet ureueng meugah
Jalan salah bek tatu
Riwang laju cut meutuah
Bek gob teugah nama keuji

Bek sampoe mate ro darah
Yoh goh susah karong wali
Bek sampoe ulon meulangkah
Gata susah reuloh nanggri

Meungka reuloh gampong nanggroe
Gata putroe roh gob caci
Gata jitueng nanggroe jitueng
Bandum ureueng jeuet abdi

Bek putroe sampoe lon timpeueng
Sayang buleuen nama keuji
Meunan haba dalam surat
Teuma geucap uleh Nabi

Nibak sarong pi geuboh cap
Alamat keu putroe siti
Bak beuragoe neujok surat
Kajak intat bek treb lawi

Beuragoe jisambot surat
Laju jikab deungan bibi
Dalam hawa jipo leugat
Jitakat nanggroe putroe ti

Nanggroe Saba' troh le leugat
Jitakat meuligoe cut ti
Jipo le cong meuligoe
Jikalon proe kanan kiri

Jieu meuligoe pucok intan
Jikarang ngon mata pudi
Meucahya uroe ngon malam
Trang beundrang sampoe u bumi

Batee intan jeueb-jeueb sagoe
Hu sang uroe hana sakri
Batee yakut batee nilam
Meuribee ban dum jilhang lhi

Goh lom jieu meunan macam
Lam alam di ateueh bumi
Meuligoe manyang sileupah
Nam reutoh kada deungon bumi

Jicat ie meuh ijo mirah
Ajeb leupah wahe akhi
Nam reutoh hah teuma luah
Kaya Allah keunan neubri

Cicem meuh jiboh di pucak
Hu meubhak-bhak kanan kiri
Lam pruet cicem ka jihayak
Kheulumbak deungon kasturi

Jipot angen jibapo bee
Le that lahee nyang peureugi
Ureueng kalon le nyang seudee
Hana malee jitanyong kri

Dum bee cicem meunan bagoe
Bee putroe na limong kali
Teuntee mabok dum sinaroe
Cit troe keudroe han peue nasi

Adat jipoh habeh umu
Nyang nafsu keunan jilari
Cit troe keudroe han payah bu
Meunan laku wahe akhi

Bah ulama han ek saba
'Oh meusua roh teukeudi
Meunyo geueu putroe muda
Kitab raya roh meugule

Cut Beulukeh bak masa nyan
Teungeut pangsan tuan siti
Dalam kama cut meusubang
Hingga datang hud-hud ini

Beuragoe cicem analan
Surat nyan jiboh lam jari
Dalam jari putroe bintang
Teubiet rijang ka jititi

Beuragoe piyoh bak tingkap
Jidong siat jibeureunti
Cut putroe pi jak leugat
Pirak lipat duek beureunti

Beuragoe laju beurcakap
Ampon deelat raja putri
Nyan pat surat lon kujak woe
Jarak nanggroe troh keumari

Laju jipo hud-hud beuragoe
Tuan putroe ulon kheun kri
Jingo suara cicem pindoe
Sang lam lumpoe tuan siti

Sang lam jaga sang lam lumpoe
Meunan bagoe jih ka sangsi
teuma leumah jieu surat
Jicok leugat uleh siti

Jibuka jibaca leugat
Haba ajab hana sakri
Awai akhe putroe baca
Muphom makna sama sikali

Haba that kreueh bak maulana
Keunoe teuka ubak siti
Habeh jipham dum sigala
Putroe muda hate ka gli

Putroe Beulukeh teuka susah
Reuoh reuah hana sakri
Teubiet reuoh bajee basah
Sang arwah ka jilari

Lam kama jiteubiet laju
Hei sidadu le di bumi
Kahei keunoe dum kaom ku
Barat timu kayue ili

Geusyik keujruen uleebalang
Sikalian bek treb lawi
Sidadu ngo kheun sulotan
Jikrah yoh nyan sama sikali

'Oh troh watee laju teuka
Peunoh kuta raja duli
Dum pahlawan teuga-teuga
Padum raja meuntroe wazi

Raja Beulukeh jatuh sabda
Hai seedara sama sikali
Geutanyoe sang bala teuka
Peue bicara tapeugah kri

Troh surat bak saboh raja
Di Syam teuka ubak kami
Saboh cicem nyang jak intat
Dua deurajat raja ini

Pangkat nyang phon nyan sulotan
Keumudian jeuet keu Nabi
Nama raja nyan Sulaiman
Rasul Tuhan peujeuet bumi

Geupeugah droe Rasul Tuhan
Meunan geutrang ubak kami
Tuhan langet geuyue khadam
Geuyue buang agama ini

Soe han pateh geupeukaram
Geupeujeuet prang hanco bumi
Panglima ngo kheun meukuta
Pucat muka sama sikali

Seureuta jijawueub kata
Bah jiteuka nyan keumari
Kamoe bandum meutem meutha
Le lasyeuka wahe duli

Putroe kheun keupeue lasyeuka
That kuasa raja ini
nabi Sulaiman sidroe raja
That geuthee na atueuh bumi

Ek jihukom jen ngon insan
Dum hewan atueuh bumi
Trok bak cicem nyang teureubang
Sikalian asoe bumi

Soe han seumbah Allah Tuhan
Jipeukaram sama sikali
Agama nyoe geuyue buang
Allah Tuhan geuyue puji

Toh ileumee nibak gata
Nyoe bala raya sikali
Panglima kheun Po Meukuta
Bahle teuka wahe duli

Keupeue cit le dum panglima
Neupeulara uleh duli
Meuploh ribee neubri eumpeuen
U mideuen goh lom sikali

Nyang ugama wajeb tatheun
Kamoe neubileueng wahe duli
Haba surat le beurakah
Keumeung cok kah peuleumah kri

Ka tan buet beuna meungpeugah
Jikheun gajah lapan lagi
Hana patot hai khalifah
That bideu' ah haba ini

Bah le keunoë jimeulangkah
Neueu beudraih ulon tadi
Lom jijawueub putroe indah
Bek peumudah haba ini

Pike dilee bek jeuet susah
Dudoe teulah hana le hi
Meungka reuloh gampong nanggroe
Tan guna roe le mita kri

Meunyo luka timoh bak dhoe
Rot muka nyoe ie jiili
Tapeusiblah yoh goh paloe
Mita nyoe jalan nyang suci

Tapike beuhabeh-habeh
Yoh goh paleh nyan tacari
Yoh goh keuji deungon jaeh
Tapileh bek roh teukeudi

Adat tamoe han soe peuiem
Lon pi yatim hana abi
Peue lom lon ureueng miseukin
Han soe tem ngieng hana wali

Meunan jikheun tuan putroe
Sambinoe hate ka sangsi
Rab meutuah bungong geutoe
Jikeumeung woe bak nyang suci

Panglima dum han le haba
Raja-raja hate ngeri
Lom marit raja meukuta
Nibak hamba na saboh kri

Nabi Sulaiman meugah raya

Ateueh donya sangat ahli

Bahle taeu keulakuan

Pakri macam deungon sakti

Tayue kalon ngon angkatan

Dua juhan yue peureugi

Tayue kalon phui deungon brat

Taurat samasikali

Meunan jikheun raja deelat

Jawueub leugat meuntri-meuntri

Ban nyang titah nibak deelat

Seutuju that nibak kami

Meung ek tatheun bek tadeelat

Meurtabat keu jih bek tabri

Teuma lheueh nyan putroe bintang

Jihei rijang dua meuntri

Ban dua ureueng bijakan

Yue jak rijang uleh cut ti

Jiyue me ngon peurseumbahan

Intan beurlian na lhee guni

Siribee namiet teubosan

Siploh rakan ureueng ahli

Meuh ngon pirak meuploh Juta

Laju bungka sama sikali

Rot lam uteuen dum sigala

Padum lama jipeureugi

U nanggroe Syam troh jilalu

Ubak pinto laju peureugi

Peugah droe ubak peununggu

Meunafsu meungadap Nabi

Kawai pinto peugah laju

Sinoe teungku lon jak kheun kri

Kawai pinto pi jilalu

Jak kheun laku ubak Nabi
Jikheun ureueng jak meungadap
Na jih pat di lua wadi

Nanggroe Saba' geubeurangkat
Suroh deelat nyan keumari
Kheun Nabi peutamong leugat
Bek lambat kaba bak kami

Kawai pinto teuduek siat
Lon riwayat ureueng peureugi
Ateueh putroe bandua droe
Seureuta nyoe laen lagi

Jikalon hai jeueb-jeueb sagoe
Phon lam nanggroe troh u pasi
Jikalon deungan angkatan
Dum pahlawan sangat ahli

Tandra mantong muploh macam
bangsa insan bangsa pari
Lua kuta gajah meukawan
Rimueng agam badeukek tuwi

Saboh sagoe badeukek meuindram
Kala pisan ateueh bumi
Jieu tandra Nabi Sulaiman
Angen rakhan nyang peunari

Cit diateueh dum meulayang
Meuribee ban dum keurusi
That teuceungang ureueng dua
Dalam dada nyan bagini

Bit raja nyoe kuat raya
Tan kuasa ureueng taki
Hana meusoe keumeung langga
Beurangri raja gadoh ahli

Jieu Nabi ateueh tahta
Nyang di lingka meuntri-meuntri
Meuploh ribee raja-raja
Meuploh laksa nyang sipai

Nyang namiet han ek takira
Troph meujuta bak laku hi
Nyang that tahe antusan dua
Hana haba jeuet peugah kri

Kawai pinto pi ka teuka
Laju jiba ubak Nabi
Peutamong laju le bandua
Bak maulana troh peureugi

Laju seumbah yoh nyan sigra
bandua tundok u bumi
'Oh jikalon Nabi Sulaiman
Rupa na ban bintang pari

Teiduek ateueh tahta keurajaan
Di hadapan meuntri-meuntri
nyang di likot bangsa suang
Biek mambang afrit asi

Di keulileng dum binatang
Gajah balohan r imueng babi
Ureueng dua utosan putroe
Sang kon le droe meunan hi

Teumakot that hana bagoe
Yo ngon asoe leupie gaki
Suroh Nabi yue bri teumpat
Bak indah that cong keurusi

Seureuta neutanyong leugat
Na keurabat laen lagi
Antosan kheun na dilua
Siploh sahja kawan kami

Jeuet dua blaih dengan hamba
Kheun maulana ba keumari
Teuma jitueng laju jiba
Sama-sama hadapan Nabi

Geubri teumpat bandum rata
Ban sigala duek beureunti
Nabi tanyong bak antosan
Peue habara tapeureugi

Ampon tuanku po jonjongan
Bungong keumang yue bak kami
Raja putroe nyang budiman
Peurseumbahan ke bawah duli

Di nanggroe Saba' kamoe datang
Lon antosan bak putroe ti
Teungoh kheun nyan po antosan
Angen rakhan suroh Nabi

Ka jiangkat le umanyang
Angkatan sama sikali
Habeh bandum ka meulayang
Lam awan angen peunari

Antosan dua guyang ulee
Hana jithee angen lari
Deungon kawan siploh teuntee
Meuhasek ulee sama sikali

Hana sapeue jeuet jipeugah
Teuhah babah lagee guci
Meutamah yo han peue peugah
Han le darah jaroe gaki

Lam tuboh gadoh seumangat
Sang ranab nyawong jilari
Di ateueh na siploh saat
Neukheun leugat uleh Nabi

Peutron bak bumoe wahe rakhan
Sikalian lom u bumi
Angen peutron lom angkatan
Teudong rijang ubak tadi

Ubak donya ka meuriwang
Sikalian ka meuhantri
Saboh riwayat meunan macam
Na dua ban dalam rawi

Beuragoe hud ba utosan
Suroh binatang ubak Nabi
Tujoh unta peurseumbahan
Jiyue seurah nyan ubak Nabi

Padum-padum mata pudoe
Ureueng binoe biek abdi
Bak peuneugah siribee droe
Cit beuragoe ba keumari

Saboh riwayat lagee bunoe
Pi dua nyoe saboh jadi
Padum-padum meunyeuk meubee
Meuploh lagee meunyeuk wangi

Goh lom troh Nabi ka neuthee
Neukheun jamee troh keumari
Nabi yue peugot meuligoe
Jamee putroe troh peureugi

Neupeucukop deungon asoe
Dum sinaroe ngon kurusi
Neuhato ngon ureueng jaga
Dalam lua biek jen pari

Nibak pinto gajah singa
Pinto lua naga sari
Sigala nyang bisa-bisa
Limpeuen kala nyang di bumi

'Oh ban troh antosan teuka
Jieu rupa buatan Nabi
'Oh jikalon keulakuan
Kuyut badan sang jilari

Han jijeuet jak u hadapan
Jimeuriwang lom keumbali
Jitakot keu putroe bintang
Peusak badan ban nyang jadi

'Oh meungadap ngon Sulaiman
Ka jeuet deumam jaroe gaki
Jipeukreueh droe yoh masa nyan
Jiseurah badan ubak Nabi

Laju jijok peurseumbahan
Sikalian suroh cut ti
Nabi neukheun jangan marahan
Han hajatkan nyang beugini

Taeu beudeuh hai antosan
Kaya Tuhan keu lon neubri
Wie ngon uneun cuba tapandang
Peue na kureueng nibak kami

Dum hareuta kabawakan
Kajak pulang ubak siti
Haba ulon kapeugah proe
Meunyo putroe raya bagi

Cit jipateh haba kamoe
Buet saboh roe kayue ungki
Meung han jipateh rayek rugoe
Lon tamong droe ubak siti

Kupeuhanco kuta nanggroe
Putroe-putroe kukoh gaki
Dalam bumoe jih kutanom
U dalam mon kuyue buni

Tandra ulon kakalon

Troh bak sidom dalam bumi
Ek katheun watee kuyue prang
Ek na jalan rot katiti

Jak leh kawoe kakheun beutrang
Nyoe kurangan kapeugah kri
Antosan ngo meunan macam
Kheun jonjongan Sulaiman Nabi

Antosan pi jilakee droe
Laju jiwoe ubak siti
Padum na treb troh u nanggroe
Ngadap putroe raja neunggri

Habeh jikheun dum sinaroe
Jihareutoe buatan Nabi
Taklok keunan jen ngon insan
Ban jipandang dum jirawi

Putroe deungo kheun antosan
Sangkot kalam teutop bibi
Dalam hate jeuet keu lubang
Mita jalan laen lagi

Bah sigo treuk kuyue peutrang
Kumeung pandang ek jitukri
Ek jituri inong agam
Kumeuiman jih nyan Nabi

Cit ka patot kuiseulam
Kuhadapkan jisuruhi
Bak masa nyan putroe muda
ureueng dua ka jicari

Jimita nyang saban rupa
Saban warna jaroe gaki
Sabe rayek santeut manyang
hana irang ube ruji

Jipeungui laju ban dua
Sapeue ija ka jiseundi
Jipeungui peukayan dara
Ban dua pasang gleueng gaki

Geulinyueng jisye nyan ban dua
Ngon boh domma ka meuriti
Lom jipeungui dua guda
Saboh dara saboh laki

Jisalob meuh ban dua boh
Putroe jroh jiujo Nabi
Zakar guda bek meuroh-roh
Jopeugadou nak bek meuri

Jiyue ikat saboh ngon pruet
Han ek teusuet 'oh taungki
Putroe Beulukeh pirak teusuet
Jimeungtueng buet deungon Nabi

Lom putroe jok saboh manikam
Jiyue rakam ubak nabi
Jiyue ikat beumeukarang
Mata intan bek roh patri

Meuh pi bek suasa pi bek
Ikat manek beubek meuri
Neureuk sabe beumeureunek
Bak na angek 'oh jiseundi

Lom putroe jok saboh kaca
Jiyue pinta ubak Nabi
Beuna ie didalam kaca
Ie teulaga han jiisi

Bek ie krueng ngon ie teulaga
Nyang keulua dalam bumi
Ie nyang teubiet dalam donya
Ban sineuna han jiisi

Ie ujeuen ie lam hawa
Ban sigala dum jiungki
Bak antosan jipeujaroe
Jak lom jinoe ubak Nabi

Jijak laju dua lhee droe
Antosan nyoe laju peureugi
Lom ka sampoe u nanggroe Syam
Tamong rijang ubak Nabi

Meungadap ngon jonjongan
Jikheun yoh nyan le beugini
Haba putroe dum jikheun ban
Ban surohan sama sikali

Phon-phon jijok ureueng dua
Yue pareksa ubak Nabi
Nyang toh agam nyang toh dara
Kheun sigra wahe saidi

Nabi deungo meunan pinta
Neuhei sigra sidroe abdi
Neulakee ie saboh tima
Ureueng dua neurah jari

Nabi peugah teuma lanja
Nyoe nyang dara nyoe nyang laki
Neuyue buka le peukayan
Antosan nyang jeuet keu saksi

'Oh ka nyata inong agam
Guda yoh nyan lom jisudi
Guda dua jijok rijang
Nabi pandang neupeurati

Nabi meuhei sidroe bujang
Naleueng padang ba keumari
Nabi neumat naleyeng sambo
Nyang jroh ijo hana sakri

Guda agam han jipeurab
Mantong bak sot jibeurdiri
Nabi kheun jih guda agam
Nyang diam teudong beurhenti

Nyoe nyang iñong jeh nyang agam
Buka rijang sama sikali
Bak masa nyan di antosan
Cok peukayan guda ini

'Oh geubuka ka leumah trang
Ban dua nyan ka geumeuri
Ban dua peue hana salah
ka sabet sah ban kheun Nabi

Lom manikam jijok bagah
Jikheun pantaih jiyue kheun kri
Ikat bek ngon meuh suasa
Meulila pi han geuasi

Bek meupatre meujeureukha
Bu meujintra sama sikali
Nabi deungo meunan kata
Neuhei diwa neuyue sudi

Manikam nyan neuyue daya
Siat saja lheueh dipudi
Meuh pi kon suasa pi kon
Sangat carong dewa ini

Teuma kaca ka jijok lom
Ie krueng ie mon hana asi
Ie ujeuen pi han geukira
Dalam kaca beutaisi

Nabi deungo meunan kata
Dua guda geuyue lari
Geuyue peuplueng dua guda
Agam dara geupeulari

'Oh seb payah dua guda
Keulua reuoh u gaki
Geupeupiyoh teuma guda
Geutheun tima reuoh lari

Reuoh peunoh saboh tima
Dalam kaca geuyue isi
Geujok laju bak antosan
Puwoe rijang jok keu siti

Ban peuet peue nyan geupulang
Jak woe rijang ka keumbali
Antosan laju ka jiwoe
Troph bak putroe raja nanggri

Ban amanat yoh saboh roe
Pulang jinoe ubak siti
Ban jilakee bandum peunoh
Cut putroe jroh teukab jari

Hate putroe han le meuoh
Buleuen peunoh gaduh ahli
Jikalon ie dalam kaca
Putroe muda saboh ahli

Ka jitupeue reuoh guda
Cut Meutia teukab bibi
Bak jipike sangat hireuen
Han meuteumeung macam ini

Patot meugah lam keurajeuen
Hana ureueng nyang atasi
Patot that ulon meuteumeung
Kueumpeung bek troh keumari

Meung troh keunoe teuka susah
Nanggroe bicah jeuet keu tuwi
Bahle keudeh lon meulangkah
Beuthat payah lon peureugi

Asai nanggroe beuseulamat
Lon beurangkat ubak Nabi
Meunan pike putroe kasab
Musyawarat putik giri

Meureubok jiwoe ditarat
Jidong siat dicong agu
AMMA BAKDU nyoe nyang cakap
Leubeh azab wahe teungku

Nabi Sulaiman muwое riwayat
Duek bak teumpat nyang meusyeuhu
Ateueh tahta keurajaan
Meuntroe khadam muploh ribu

Padum raja ngon sulton
Jen ngon insan bangsa diu
Nabi tanyong bak sigala
Bak peurdahna soe nyang mampu

Meuligoe deungan istana
Dum hareuta deungan leupu
Beusajan ngon kuta-kuta
Ban sigala ubak aku

Putroe Beulukeh soe ek bawa
Beutroh sigra hadapanku
Ka ji seuot jen afrit
Nyang meusaket bahle buetku

Ulon nyang ba bungong ruseb
Hana treb keunoe lon buru
Umu siuroe hingga seupot
Troph lon angkat raja itu

Yoh nyan Nabi ka neuseuot
Ban nyang patot jeuet bak aku
Soe nyang pantaih laen nibak nyan
Beurijang keunoe lon nafsu

Asap khaba seuot rijang
Bah lon tuan nyang beugitu
Ngon kuasa sidroe Tuhan
Dua jeuem kalam meuteumee ie

Lheueh jikheun nyan aneuk khaba
Hadap muka yoh nyan laju
U langet jihadap muka
Meunoe do'a jikheun laju

Ya hayyan ya aswa
Ya hayyan rabbul ghafur
Gata sidroe that kuasa
Peutroh pinta ban nyang napsu

Beutroh keunoe meuligoe kuta
Dum sigala putroe meusyeuhu
Beuhabeh deungon hareuta
Dum semua asoe leupu

Meunan Asap jimupinta
Hadap muka bak Tuhanku
Ngon kuasa sidroe Tuhan
ka datang tandra cut meulu

Putroe Beulukeh keunoe datang
Sikalian deungon leupu
Ka teudong rab kuta nanggroe
Sinan toe rab ngon panghulu

Bak masa nyan putroe Beulukeh
Bungong puteh kalon laku
Kon le bak sot pocut puteh
Tinggai wareh bungong meulu

Tinggai nanggroe deungon rakyat
Tuhan intat keu panghulu
Kareuna putroe na meuhajat
Jimeung ngadap nyan panghulu

Tuhan bri ka sampie hajat
Sidroe ahad tulong bantu
Putroe kalon timu barat
Meulaen that ho nyang jieu

Putroe kalon keudeh u blang
Jieu binatang dum teudu-du
Gajah rimueng meukeukawan
Rimueng agam badeuek ulu

Putroe eu siblah u barat
Deuh malakat dum teudu-du
Batee yakut dum meukilat
Intan le that troh u leupu

Putroe tangah lom u manyang
Disinan pi leumah laku
Deuh jieu tandra Sulaiman
Dalam awan meucanya hu

Ka jiangkat uleh rakhan
Nabi Sulaiman leumah jieu
Ateueh tahta keurajaan
Muka na ban panyot lampu

Putroe Beulukeh ka teuingat
Soe nyang angkat keunoe aku
Peue nanggroe nyoe soe bu deelat
Sangat ajab hantom lon eu

Dalam hate ka mubayang
Nyo Sulaiman nyang bawaku
Meunurot kukalon macam
Lam awan tandra panghulu

Lom meunurot kheun antosan
Nyo raja nyan nyang bawa aku
Putroe Beulukeh ka meutuah
Jitangah u langet laju

Laju jikheun deungon lidah
Ya Allah gata nyang ghafur
Hadap dilee ulon buang
Bak iseulam ulon maju

Sikali-kali han lon riwang
Gata Tuhan hadap aku
Meunan jikheun cut meusuang
U manyang jitangah laju

Hai Tuhan nyang peujeuet hamba
Dum sigala droe neuh ghafur
Nyang peujeuet langet ngon donya
Dum sigala barat timu

Teungoh putroe jimeudo'a
Suroh anbia sidroe panghulu
Bak putroe keunan troh teuka
Tanyong haba bak cut meulu

Pane troh putroe jroh rupa
Pane teuka dapat lampu
Putroe jawueub laju teupat
Allah ahad nyang bawaku

Bak nanggroe nyoe Tuhan intat
Beuseulamat ngon panjang umu
Cit lon hajat keu nanggroe Syam
Ngon Sulaiman hadap aku

Meutuah mata ka lon pandang
Nanggroe nyang leubeh makmu
Sahbat Nabi deungo meunan
Bak jonjongan jiwoe laju

Haba putroe dum jikheun ban
Sikalian jikheun laju
Habeh jikheun dum sinaroe
Panghulee nyoe suroh laju

Neumeuhei jen dum sinaroe
Yue peugot nyoe keu cut meulu
Meuligoe putroe Beulukeh
Neuyue tindeh batee nyang hu

Neuyue ato nyang peureuseh
Neuyue pileh nyang got baro
Batee yakut deungon pualam
Jeuneh intan nyang leubeh hu

Watee beukah beundrang
Cahya trang ban keululu
'Oh jeuet angan sang meubet-bet
Miseue laot jibeudoh hu

Puteh mirah kalang kalot
Cahya jigrob ban keululu
Putroe Beulukeh bak masa nyan
Jipandang that laen laku

Meuligoe sangat ubahan
Cut bintang jak kalon laju
Laju jitren u halaman
Jipandang barat ngon timu

Meusajan ngon deundayang
Meuen bintang di leuen leupu
Nabi Sulaiman bak watee nyan
Duek seumanyam di leuen leupu

Ban neukalon putroe beurjalan
Beulukeh nyan sang panyot hu
Cahya muka sang buleuen trang
Keutiwasan bintang timu

Yoh nyan Nabi ka teuingat
Amanat afrit hantu
Ubak Nabi jikheun bi'at
Cut meusurat pha beurbulu

Yoh nyan Nabi kalon beuteh
Neungieng keudeh bak bintang hu
Ban dua blah Nabi pileh
Sangat meuceh keunan neueu

Sangat dusta iblis paleh
Jipeujaeh putroe meulu
Jisangka Nabi neupateh
Bek neugaseh keu cut meulu

Beulukeh nibak masa nyan
Teungoh girang di leuen leupu
Teungoh galak eu halaman
Kiri kanan putroe maju

Jibet langkah bak beurjalan
Manyang-manyang kon sigeutu
Angen beuet ija pinggang
Beuteh bintang meucahya hu

Deuh nabi eu ngon leubeh trang
Putroe bintang tan jitahu
Meung sion hana bulee pha
That duseuta iblis hantu

Beulukeh teuma jigisa
Leumah nyata jieu panghulu
Ka meungadap ngon anbia
Dua muka ka beuradu

Nabi neuduek ateuah tahta
Leuen istana nyang meusyeuhu
Beulukeh pi keunan teuka
Deuh nyata jieu panghulu

Sangat malee putroe muda
Yoh jiteuka hana jieu
Han jitupeue sinan Nabi
Sinyak ti yoh nyan that malu

Jimeung gisa han le meukri

Keureuna Nabi keunan neueu
Ka keu teudong di keue Nabi
Ka teupike putroe meulu

Nyoe ku gisa hana le jroh
Sang ku beudoh kon tuanku
Nama ulon sangat gadoh
Jeueb lampoh soh gob kheun laku

Cit ka kada ulon meunoe
Uroe nyoe meurumpok panghulu
Bak masa nyan bungong geutoe
Ji peukreuh droe bintang timu

Keu malee han le jikira
Ka gisa keunan laju
Meuhadap deungon maulana
Jaroe dua beuot laju

Jiseumbah Nabi Sulaiman
Jonjongan yue piyoh laju
Bak kurusi nyang keumasan
Dua intan disinan meupru

Teuma Nabi neukheun leugat
Haba beureukat di panghulu
Gata keunoe soe jak intat
Pane teumpat keunoe lalu

Pane nanggroe ta meulangkah
Peue na susah deungon napsu
Putroe Beulukeh laju peugah
Jaroe dua blaih beuet buju

Lon nyoe datang kheundak Allah
Tinggai syoekah meuploh ribu
Cinta ulon sangat ceudah
Harap lon sah keu tuanku

Lon uroe nyoe lon iseulam
Lon buang agama dulu
Nabi deungo meunan kalam
Neukheun rijang meunoe laku

Ka meutuah gata bintang
Kheundak Tuhan zat nyang satu
Meusampe gata beusaran
Ta peukong nanggroe nyang makmu

Teuma Nabi yue kheun leugat
Dua sahadat bak cut meulu
Taek saksi Allah ahad
Meungadap po nyang satu

Nyang peujeuet sigala alam
Jen ngon insan jeuneh hantu
Langet bumoe sikalian
Puteh hitam ijo biru

Nabi Sulaiman Rasulullah
Putroe indah kabul laju
Agama Ibrahim nyang sibeuna
Pubuet gata hai bintang hu

Agama gata hana beuna
Bek le gisa bungong meulu
'Oh lheueh kabul po jroh rupa
Kheun anbia teuma laju

Meungta rela cut meutuah
Lon meunikah ngon cut meulu
Keureuna gata ka meutuah
Bek leupah ditangan aku

Ka jijawueb buleuen peuet blaih
Rasulullah ban nyang napsu
Ateueh ulee ulon keubah
Rahmat Allah ateueh aku

Nabi deungo kheun cut indah
Neupeugah bak Asap laju
Hai Asap baca khuteubah
Lon meunikah ngon cut meulu

Yoh nyan Asap baca khuteubah
Alhamdulillah pujoe ghafur
Seulaweuet keu Nabiullah
Neumeunikah Nabi laju

Kabul ijab pi ka sudah
Putroe indah tron u leupu
Bak teumpat droe dilee nyang ka
Bak istana nyang meusyeuhu

Sajan Nabi nyang mulia
Beungoh sinja pat panghulu
Teuma Nabi lom keunira
Ureueng teuka neupeumakmu

Beulukeh ureueng mulia
Saboh raja nyang meusyeuhu
Di Nabi pi neupeumulia
Istana geutamah laju

Neupeuluah ngon istana
Tamah kama le panghulu
Geuyue ato ngon kurusi
Peurumadani bee meulaku

Anteng-anteng jawareudi
Bak teupi geulhap beulau
Lom geuboh pirak seutanggi
Geusandi ulee ngon iku

Soe nyang kalon hate galak
Cicem meurak geupeuhadu
Bak meuneuen bungong meurak
Bak jikeuprak oh ban seuu

Neuyue peuget ngon pupaleh
Peuet boh tameh beusoe sulu
Ban peuet sagoe na pupaleh
Manyang leubeh nibak bak u

Lhee reutoh deupa oh nan manyang
Dalam awan meusalob hu
Ban peuet sagoe meunan macam
Nabi keunan sabé lalu

Pat kurusi sinan diam
Meuh meukarang ulee iku
Manyang nibak kuta Nambrud
Sangat hayeuet watee taeu

Putroe Beulukeh kalon macam
Oh jipandang hate rindu
Ka teuingat putroe bintang
Jideungoran zaman dulu

Raja Nambrud saboh masa
Lam hawa teumpat beuradu
Meuligoe jih dalam hawa
Kon bak donya sinoe jidu

Manyang lom nyoe lipat dua
Buet anbia nyang panghulu
Di Nabi neupeuget meunan
Hajat di nyan laen napsu

Kon napsu disinan diam
Neumeung pandang barat timu
Saboh kurusi neukalon Rom
Dum nan lambong ngon nyan taeu

Kurusи nyan kalon gampong
Meunan muphom di panghulu
Saboh kurusi Nabi pasang
Nanggroe 'Ajam sinan neueu

Hana padok 'oh neupandang
Leumah teurang barat ngon timu
Saboh kurusi neueu di Yaman
Jonjongan meunan geunafsu

Cit leumah toe 'oh neupandang
Padok jih han meusigeutu
Kon geusigak kon geurakam
Hana reusam bak panghulu

Hana seunijak hana lagak
Kon geurancak na beugitu
'Oh neupeugah kon geurancak
Nyang han layak han neumeusu

Kon keuheundak droe Nabiullah
Buet nyang teugah han neulalu
Nyang neujalan suroh Allah
Han ube drah pi neujampu

Bak siuroe Nabiullah
Neupeugah bak Asab laju
Lon na hajat lon meulangkah
Kalon dairah barat timu

Nabi meuhei laju angen
Lon kumeuen u laot ju
Hamparan lon jak peumeuen
That ingin laot lon meueu

Yoh nyan angen laju datang
Hamparan jiangkat laju
Deungon tandra sikalian
Jitatang baplueng meu'u'u

Troh u laot han jan siat
Nabi lihat blang rot timu
Saboh pulo Nabi lihat
Dalam asap deuh Nabi eu

Leumah guda sinan le that
Teungoh jikap rumput paku
Pulo nyan di teungoh laot
Dalam sagob deuh Nabi eu

Kawan guda naleueng ijo
Disinan le kon sigeutu
Guda nyan bandum meusayeuep
Got that sifeuet deuh Nabi eu

Naleueng timoh got that santeut
Guda nyan kleuet kon sigeutu
Pulo nyan hana manusia
Nanggroe guda jeuet kheun dulu

Sinan meurot bandum guda
Geunap masa keunan maju
'Oh ka troe laju teureubang
Nabi pandang leunyap laju

Han meuho le jiteureubang
Lam awan han le deuh neueu
Nabi meuhei Astarukhi
Ka neusudi bak jih laju

Na kadeungo Astarukhi
Ho jilari guda itu
Ka jijawueeb yoh nyan pantaih
Laen dairah ka jilalu

Adak meunan nyoe kupeugah
Kadrob le kah bri keu aku
Jak leh kadrob bagah-bagah
Galak leupah watee lon eu

Astarukhi jawueeb pantaih
Hana ilah nibak aku
Hana daya rot lon ilah
Kleuet sileupah guda itu

Bak jen Simud neuyue reupah
Bak jih mudah jipeulaku
Nabi deungo jikheun meunan
Simud nyan neumeuhei laju

Hai Simud kajak drob rijang
Guda nyan kabri keu aku
Keureuna kah raja seetan
Jak rijang kadrob keu aku

Cuco Iblih that geumalee
Meuploh lagee jiboh tipu
Kah nyan Lakeh nan nyang dilee
Jak drob keu kee guda laju

Jaweeub si Lakeh hai pangulee
Guda asee bah lon tipu
Bek ulon darohaka
Nibak gata hai panghulu

Meunyo bak lon roh murka
Bandum guda nyan kubalu
'Oh han jitem watee kuba
Kupeuphana ban sikuphu

Nabi kheun bek kaenanya
Kadrob kaba ubak aku
Walee han ek jih kadaya
Han murka kah bak aku

Simud nyan dua boh nama
Ka lheueh murka masa dulu
Ka jiboh droe saboh masa
Laen donya ka jilalu

Ka lheueh jilob laot raya
Teumeureuka zaman dulu
Yoh masa jiba u rita
Jeueb beuluka ka jimaju

Cit baro troh nyan jigisa
Lom anbia suroh laju
Neumeueu jih pakri rupa
Lom ceulaka masa dulu

Simud sangat ceulaka
Jimeungdaya lom panghulu
Pura-pura jimeudo'a
Jen ceulaka le that laku

Ka jibeudoh jijak lanja
Lom u rimba ka jiburu
Ka jijak seutot seedara
Seurupa ngon guda itu

Ka meuteumee ngon jen guda
Jisah haba le sigeutu
Tatulong lon wahe rakan
Bak Sulaiman jak ngon aku

Jen guda pi turot rijang
Bak jonjongan jiba laju
Meughadap deungon Sulaiman
Peurseumbahan bak panghulu

Nyoe pat guda nyang budiman
Hai jonjongan nyang meulaku
Bek neugalak guda sibrang
Han got ragam watee gob eu

Sira jikheun jih ka deumam
Keu jonjongan that jimalu
Jitakot that keu ceumeuti
Kadang Nabi jih neupalu

Lom ka neukheun uleh Nabi
Guda ini han kumau
Kuyue drob guda nyang ijo
Nyoe guda tho kaba bak ku

Kulet-kulet jih ka keundo
Bak baho ka meuboh kulu
Guda nyoe jetet keu peugantoe
Ba jinoe u pulo itu

Ka jijawueub lom jen pindoe
Suroh kamoe han jiaku
Meulaenkan surat po beuna
Teutap sahja jidrob laju

Lom guda nyan dua teumpat
Ret barat na pulo satu
Jimeuret pulo ret barat
Minum meuhat pulo timu

Meunan kayem ulon lihat
Sulet pi that guda itu
Nabi deungo jikheun meunan
Jonjongan meunoe neulaku

Neujok bihuih yoh masa nyan
Yue me rijang keudeh laju
Pat nyang na ie neuyue keubah
Watee grah guda jilalu

Meunan suroh Nabiullah
Jime pantaih le jen itu
Laju jiboh ban geutitah
Han le ubah takot malu

Guda pi troh keunan teuka
Grah pi raya kon sigeutu
Hana meujan jipinta
Jijeb lanja yoh nyan laju

Oh sare troe dum sigala
Bandum guda mata sapu
Ka mabok meugisa-gisa
Reubah lanja dum teudu-du

Ka meutamon lagee phana
Simut teuma ikat laju
Jiboh laju bandum guda
Taloe nyang kha ka jicuru

Lheueh jiikat ban sikawan
Guda pangsan puleh laju
Jieu taloe ka bak badan
Jimeulawan ka'a ka'u

kong taloe han ek jilawan
Iem jidiam yoh nyan laju
Ka jihue le jen suang
Bak jonjongan jiba laju

Bak masa nyan Nabiullah
Ka ubah suroh Tuhanku
Watee 'asa nyang ka leupah
Teuka susah nyan panghulu

Nabi kalon uroe ka malam
Susah yoh nyan kon sigeutu
Jibrai pi keunan datang
Neukheun yoh nyan hai Nabiku

Gata ubah suroh Tuhan
Seumbahyang **ka** gadoh waktu
Nabiullah bak masa nyan
Bak Tuhan neusujud laju

Ya Tuhanku gata nyang thee
Ka jitipee lon le hantu
Lon ka lupa saboh watee
Guda asee lon jitipu

Neutarek lom matauroe
Bak sot bunoe ya Tuhanku
Lon seumbahyang watee asa
Lon ka lupa keunong tipu

Tren firman nibak Rabbi
Matahari riwang laju
Nabi Sulaiman neuseumbahyang
Ngadap Tuhan zat yang satu

dua rakaat Nabi seumbahyang
Hingga saleuem le panghulu
Lheueh neusaleuem Nabi mulia
Uroe pi ka malam laju

Guda bandum ka meusapat
Ka jiikat le jen hantu
Di Nabi laju neupeurab
Neusie leugat guda itu

Na nyang neupoh na nyang neucang
Neureupang sayeuep deungon iku
Na nyang neuwiet neukuran-kuran
Nyang biek suang neuboh laju

Nyang jeuheut nyan bandum neupoh
Ka neuboh dalam jeuruju
Nyang neusie neupileh nyang jroh
Neuuroh faki deungon teungku

Neubulueng asoe le Nabi
Keu faki bandum neuyue eu
Teuma dudoe neukeumbali
Neuwoe Nabi le u leupu

Padum uroe tan peureugi
Teuma Nabi neukheun laju
Wahe Simud nyang kutanyong
Kheun beukeunong ubak aku

Kah kayem jak baroh tunong
Jeueb-jeueb umong na kalalu
Rahmat Allah dum lam donya
Dum simua ka ulon eu

Siumu na donya
Padum lama keurajeuenku
Ube ka troh lon peuteuka
Jeueb-jeueb donya ka lon lalu

Pat na raja nyang ceulaka
Nyang han seumbah zat nyang satu
Seumbah Simud ya maulana
Saboh donya hai panghulu

Saboh pulo sidroe deelat
Martabat leubeh meusyeuhu
Raja nyan di dalam siasat
Jiyue deelat droe jih satu

Nanggroe makmu han peue peugah
Meuh mirah meuseueu-seueu
Batee intan that bahrollah
Ijo mirah ratna mutu

Bak-bak peukan dum jiruah
Sangat meugah raja itu
Nanggroe luah jroh bukon le
Sampoe u gle rakyat 'a'u

Ie krueng tabeue pucok u gle
Bak pante intan teududu
Raja Anggor po nanggroe nyan
Seumbah ayam raja itu

di lon dilee na beurjalan
Lon eu ragam nanggroe itu
Sangat payah tajak keunan
Kreueh larangan bak panghulu

Meulaenkan jeuet ubah ruman
Basa sinan laen laku
Masa lon jak ya maulana
Saboh masa ulon lalu

Lon ubah droe balek rupa
Lon mita eungkot nyang ulu
Lam pruet eungkot lon lob sigra
Hingga jiba keunan laju

Troh nanggroe nyan lon eungkot ba
Lon keulua hař panghulu
Teuma lon jak lon meusafe
Lagee faki lon peulaku

Lam nanggroe nyan lon peureugi
Ulee ili ulon lalu
Lon kalon saboh meuligoe
Manyang jih nyoe han deuh taeu

Dalam awan keudeh sampoe
Luah han soe hai panghulu
Di leuen meuligoe saboh padang
Gambaran saboh jipeudu

Meunara saboh jipeudong
burong inong sinan jidu
Cicem ukab saleukek rupa
Jiboh mata meuh tan meujampu

Raya cicem ban geureuda
Pruet jih raya jroh meuseuu
Lam pruet cicem lagee langet
Sang meumet-met watee taeu

'Oh jilingiek taeu singet
Sang meublet-blet ujung iku
Yub meunara dua rimueng
On geulunyueng be on tampus

Raya badan na ube krong
Manyang lambong sikhan bak u
Patong ureueng toe ngon binteh
Pha jih meuceh ube bak u

Peuet ploh deupa panyang beuteh
Yo teuh leubeh watee taeu
Treh lon tamong lam meuligoe
Lon eu asoe hai panghulu

Peuet boh bilek lam meuligoe
Peunoh asoe inong makmu
Saboh bilek aneuk dara
Bandum rupa sang panyot hu

Namiet putroe dum simua
Aneuk dara baro umu
Lam kawan sidroe tuha
Siblah mata nyan ka sapu

Jitoh boh leuek dalam mata
Sajan dara duek meununggu
Rueng ka bungkok that ka tuha
Di keupala jih ok ka hu

Di keue jih na aneuk inong
Rupa bangon panyot lampu
Saleuke Yusuf sang-sang bangon
That meukeunong watee taeu

Watee jikhem mameh ranum
'Oh teusinyom meublet-blet hu
Na siat ulon dong sinan
Manyak nyan jitren laju

Peuet ribee nyang rot geunireng
Jikeulileng aneuk ibu
'Oh jiteubiet lua kama
Ureueng jak meuploh ribu

Lon tanyong bak inong tuha
Deungan basa ureueng situ
Aneuk nyan lon tanyong nama
Jipeuhaba teuma laju

Nyankeu aneuk raja raya
Putroe muda nyang meusyeuhu
Raja Anggor po aneukda
That jroh rupa sang bintang hu

Lon tanyong hai rimueng dua
Peue kuasa sinan teungku
Manok agam geupeulara
Peue na guna peugah laju

Bak pucok bubong meuligoe
Manok nyoe sinan jipeudu
Peue ibarat dum sinaroe
Kheun bak kamoe meung sigeutu

Ka jiseuot laen sidroe
Gata nyoe soe pane lalu
Pane donya tajak keunoe
Peue hajat nyoe keunoe lalu

Ulon seuot jarak nanggroe
Lon jak keunoe raya nafsu
Ulon nyoe jak ngon sengaja
Kalon donya barat timu

Pat nyang rame pat nyang hana
Peue bicara dum panghulu
Kheun ureueng nyan nibak hamba
Nyokeu raja nyang meusyeuhu

Raja Anggor cit geupuja
That kuasa barat timu
Cicem ukap tanda kuat
Raja deelat cit geumalu

Han soe lawan timu barat
Neumat adat donya makmu
Meunara nyan tanda ceubeueh
Sangat kreueh deungon meusyeuhu

Soe nyang lawan tan seuneulheueh
Bah tujoh geuh reubah teudu
Rimueng dua tanda juah
Soe meusanggah habeh umu

Beurapgsoe han jeuet meurimbah
Gaduh beurakah bah tuanku
Manok puteh kamoe seumbah
Nyan Potallah kamoe sibu

'Oh jiku'uek sikalian
Alamat prang musoh lalu
Kamoe bandum mat geudubang
Teubiet u blang meujak maju

'Oh troh musoh meulawan
Ngon bunyian cit jimeusu
Raja Anggor that bantahan
Dalam awan sideh leupu

Tron u donya na meujan-jan
'Oh na lawan baro taeu
Meunyo hana musoh datang
Syahi alam han tom taeu

Hana tom tron di meuligoe
Geunap uroe dalam leupu
Nyang mat rakyat ka na neutroë
Dum sinaroe jih nyang ampu

Meunan Simud kheun bak Nabi
Ji peuturi ulee iku
Nabi Sulaiman ka neutukri
Neumeuheu le angen laju

Angen pupur tandra Nabi
Neupeureugi nanggroë itu
Neuhimpon sigala tandra
Dalam hawa ngon meudru-dru

Neubeurangkat laju ngon tandra
Ngon lasyeuka meuploh ribu
Tan padum treb angen bawa
Troh maulana nanggroe itu

Jikalon le cicem ukap
Ka meu'ab'-ab le jimeusu
Di manok pi ka meu'ab'-ab
Jigrob lompat ka'a-ka'u

Meusu le gong ngon keucapi
Suleng bangsi ngon beureugu
Jeueb-jeueb sagoe ka meu'i-i
Ka ca-ci buloh peurindu

Ureueng nanggroe yoh nyan kiam
Peuleungkapan dum sidadu
Tarek leumbeng keucak-cik nyang
Teubiet u blang ngon meu'u-u

Bajee dirah dum jipakai
Keuteupong beusoe dum sidadu
Didalam blang yoh nyan geuwoe
Dum sinaroe ka meu'u-u

Jieu tandra dalam awan
Leumah alam cahya hu
Raja Anggor pi ka u blang
Ngon pahlawan meuploh ribu

Nabi Sulaiman dalam awan
Angen rakhan nyang peulalu
Neutron Nabi atueuh bumoe
Ban sinaroe ngon sidadu

Neuglong alam atueuh bumoe
Ban sinaroe piyoh laju
Nabi peugah ubak rakan
Peurleungkapan seedaraku

Musoh nyoe ho jisrang abrang
Peursiapan ngon sidadu
Ho panglima bek le diam
Jak lawan musoh biek hantu

Bek tatakot talawan prang
Tulong Tuhan Rabbul ghafur
Meunyo mate wahe rakan
Surga lapan bri Tuhanku

Asap deungo kheun jonjongan
Ngui peukayan yoh nyan laju
Peudeueng leuntek nibak tangan
Teubiet yoh nyan ngon meu'u'u

Ji ikat le hulee balang
Sikalian dum meu'u'u
Nabi Sulaiman pi masok prang
Bak tangan ceumeuti sulu

Nafsu angen ngon bubayang
Cahya keunong dum teudu-du
Soe nyang keunong cahya cemeuti
Bandum mate sinan sulu

Raja Anggor that beurani
Ukeueu Nabi ka jilalu
Han jitakot nyan keu Nabi
Han jituri pang-pang hulu

Nabi neukheun nibak angen
Ka peumeuen raja badu
kapoh muka raja kameng
Mangat kuneng mata nyang hu

Ka antok ngon bak keumuneng
Yub beuringen kajak peudu
Bek sabé sinoe jimeuen
Biek baneng bah lam jeuruju

Meunan neukheun le Sulaiman
Bak masa nyan suroh Tuhanku
Angen seumpom laju sinan
Ka bantangan raja badu

Asap tajo laju keunan
Di tangan peudeueng geureupu
Jikoh rukueng oleh Asap
Jiukat ngon taloe laju

Ka keumate raja bangsat
Yoh nyan rakyat pi ka karu
Jikalon ka mate deelat
Jiplueng leugat ka meu'u'u

Rimueng singa pi ka teupat
Angen rapat ka jiindru
Manok puteh ka meuwat-wat
Ngon siat bandum ka teudu

Jeueb-jeueb sagoe habeh seungab
Ka kiamat hantu-hantu
Cicem ukap pi ka mate
Ka srot bangke uyub leupu

Angen hantam sigala be
Habeh cre-bre barat timu
Raja mate nanggroe talo
Rakyat tajo barat timu

Jeueb-jeueb sagoe yoh nyan 'a'u
Raja Anggor ka lheueh teudu
Nibak nyan le that mate
Jeueb sagoe be ka meuseuu

Sabe keudroe jimupake
Han meuri le ulee iku
Peungeuh padang rakyat han le
Tinggai pari tandra panghulu

Asap khaba that beurani
Prang beurhenti han le karu
Sabab musoh habeh jiplueng
Jilangoe krueng dum meu'u'u

Han jitakot buya makeuen
Le seulinteueng lam jeuruju
Rakyat plueng bah teuduek siat
Jinoe Asap lon kheun laku

Ka troh jinoe bak useutad
Jijok leugat ulee badu
Ulee raja jok bak Nabi
Neuyue buni teuma laju

Neuyue boh laju u pasi
Ka peuili lam krueng laju
Teuma suroh le jonjongan
Neuyue buang patong laju

Bandum patong raja syeetan
Geupeulham lam laot laju
Uleue kala nyang meuangkot
Siuroe seupot nyan jiburu

Diwa-diwa dum meukalot
Peunoh laot dum geuburu
Nabi hei simud saboh roe
Tuan putroe neuyue jak eu

Aneuk raja nyang saboh roe
U meuligoe neuyue lalu
'Oh kateumee kaba keunoe
Ubak kamoe putroe itu

Simud jak le u astana
Jijak mita yoh nyan laju
Tan jiteumee ka jigisa
Bak anbia jikheun laju

Hana mupat ya maulana
Ka lon mita jeueb-jeueb leupu
Hana putroe di istana
Saleh ho ka bungong meulu

Teu leubeh get ya maulana
Jen samita neuhei laju
Jih di sideh lama kuala
Cit jitapa sinan jidu

Nabi deungo meunan haba
Jen Samita neuhei laju
Jen Samita laju teuka
Simud teuma peugah laju

Hai Samita kayue toh ujeuen
Beupunoh leuen putroe itu
Jen Samita meunan jikheun
Han ek hujeuen buet tan aku

Ulon nyoe han le keuramat
Beureukat ka lam laot ju
Oh ka mate raja deelat
Tan beureukat le bak aku

Nabi deungo meunan haba
Neumeu do'a le panghulu
Neulakee bak Tuhan Esa
Hujan teuka le meu'u-u

Rhet hujeun ube-be raga
Leuen astana putroe meulu
Bak masa nyan putroe muda
Jingo raya hujeuen meu'u-u

Lam astana ka jibeudoh
Kameh-kamoh bungong meulu
Jieu hujeuen raya tijoh
Saboh-saboh ube bak u

Ladom rhet ube boh manok
Tango preh prok sang leupieng u
Putroe muda sangat harok
Sang-sang gadoh keunan jieu

Putroe jidong bak peungadeuen
Kalon hujeuen rhet meu'u-u
Teungoh lale bungong seupeueng
Simud bajeueng troh jilalu

Laju jijok putroe buleuen
Jibaplueng ubak panghulu
Troh keudeh hadapan Nabi
Putroe jipeulheueh laju

Bak masa nyan putroe siti
Jieu Nabi sang panyot hu
Han tom jieu jroh that rupa
Tan lam donya nyang beugitu

Ka teukeujot putroe muda
Badan geumpa kon sigeutu
Lom meutamah deungon malee
Bungong keumbee yoh nyan sipu

Ka neutanyong le panghulee
Meunoe lagee kheun panghulu
Wahe putroe bungong kayee
Bek malee peugah bak aku

Gata lon tueng keu asoe juree
Bek le balee han get laku
Gata lon ba u nanggroe Syam
Kubri deundayang bak nyang nafsu

Bek le sinoe gata diam
Cuba kheun ban ubak aku
Putroe deungo haba meunan
Jikheun yoh nyan meunoë laku

Ho ayah lon po jonjongan
Lon kalon han le di leupu
Masa bunoe neujak lam prang
Goh neuriwang nyan u leupu

Meung han ayah lon nyoe
Hana jeuet roe ulon meusu
Jaweueb Nabi po sambinoe
Ayah tanyoe hana lon eu

Lon deungo ureueng hareutoe
Angen tampoe rhet u timu
Keunong angen hingga gadoh
Ureueng teuoh meunan laku

Putroe ayah ji ka gadoh
Meuroh-roh ie mata laju
Rhet seumangat buleuen peunoh
Hate reuloh hana le du

Hana sapeue jeuet jipeugah
Putroe indah moe meu'u-u
Bak masa nyan Nabiullah
Ka gundah yoh nyan sigeutu

Tuan putroe sangat susah
Weueh keu ayah kon sigeutu
Hai putroe bek le ta susah
Keu ayah han jeuet tarindu

Beuranggasoe meunyo salah
Han peue peusiblah hai nyak meulu
Teuka keudroe laknatullah
Di gata ayah jen peulaku

Ayah gata buet bidu'ah
Jiseumbah manok bulee u
Han jituri Poteu Allah
Hana leumah dum le jieu

Han jikalon langet bumoe
Deungon asoe barat timu
Soe nyang peujeuet dum sinaroe
Buta tuloe di gata du

Peue jiseumbah manok kutoe
Peue na nyoe nyan jibantu
Manok nyan eumpeuen geunyoe
Cit ek gigoe keutumon bu

Teuma jinoe pi di gata
Pakri suka peugah laju
Bek le nyak seumbah beurhala
Bak agama tamong laju

Meunghan tatem bak agama
Nyang sibeuna kon palsu
Seumbah jinoe Tuhan Esa
Nyang karonya peue nyang nafsu

Nyang peujeuet sigala-gala
Dum anika jen ngon hantu
Meung han tatem putroe muda
Gata-gata angen balu

Soe got mate cuba kira
Dalam dua tinggai satu
Putroe deungo meunan haba
Lam hate ka laen laku

Meung han kuturot kubinasa
Mate pahna ku jibalu
Habeh nanggroe ka binasa
Nyata-nyata ka jiindru

Harta-harta dum sigala
Han sapeue na le di leupu
Nyan bandum ka gob kuasa
Kumeudakwa han le aku

Meunan pike po jroh rupa
Jaweueb haba bak panghulu
Ka jjaweeub bungong pade
Ban nyang pike atueuh aku

Ulon teueh nyoe ka hak mate
Hana le soe padoe bawa
Na bacut akan teutapi
Lon sudi nibak tuanku

Hana muphom 'goh lon turi
Ampo duli pat bu leupu
Pane nanggroe keunoe datang
Siri makam pat bu leupu

Seuot Nabi nan lon tuan
Raja Sulaiman nama aku
Teumpat tahta di nanggroe Syam
Peurintah Tuhan buatan aku

Oh jideungo raja Sulaiman
Putroe bintang meunyum kuyu
Kareuna jideungo ureueng kheun nyan
Raja Sulaiman that meusyeuhu

Geu hukom sigala alam
Jen ngon insan hantu-hantu
Patot talo ayah kamoe
Kareuna gob nyoe that meusyeuhu

Meung han lon turot peurintah nyoe
Teuntee kamoe cit geuindru
Kapo mate han soe pakoe
Tan wareh droe nyang sikufu

Meunan lam pruet sinyak putroe
Jibot jaroe teuma laju
Ampo maaf ya habibi
Ateueh kami ban nyang laku

Ban nyang kheundak nibak duli
Tan meuungki meugsigeutu
Walee ulon nyang ka silab
Neupeutupat hai tuanku

Nabi kheun bah neumeuucap
Kalimah syaliadat takheun laju
Pujoee Tuhan Allah ahad
Tan syarikat tan sikufu

Insya Allah po jonjongan
Upahan kalon sigeutu
Neubri upah bak bacaan
Nyang bak tangan bri keu aku

Nabi kheun euncien bak tangan
Han jeut nyan gata meunafsu
Soe nyang sok euncien ulon nyoe
Jeuet keu rugoe dudoe pakri

Kadang-kadang cit meupaloe
Ngon euncien nyoe keunong indru
Walee jicok le pancuri
Kheundak Rabbi laju sulu

Tajeuet tueng mangat ulon bri
Teutapi bek salah aku
Putroe deungo meunan neupeugah
Han le beurakah jjiem laju

Lom jipeugoe putroe indah
Toh cit upah bri keu aku
Ka neujawueub Nabiullah
Meuligoe indah nyang beurmutu

Kuboh pucok beu meugisa
Meu meuputa ulee iku
Meusajan kuboh geunta
Kuyue rika intan nyang hu

Lom putroe meukuta alam
Ulon deundam kon sigeutu
Nak bek gata keudukaan
Deundayang kubri seuribu

Putroe kheun bak Po meukuta
Lon duka teuringat keu du
Han ek puleh hate luka
Maen mata tan sigeutu

Kheun Nabi bek le taingat
Tangadap Tuhan nyang satu
Supaya gata beuseulamat
U akhirat meuteumee du

Adak takheun tapoh-poh droe
Ayah neuh nyoe han jeuet taeu
Han hudep le gob nyan sidroe
Meunggoh sampoe janji Tuhanku

Nabi peugah meudeh meudoe
Seungap jinoe bungong meulu
Seungap siat han le jimoe
Sambinoe hana le ragu

Teuma Nabi lom neuulang
Habaran yoh bunoe laju
Peue suka gata iseulam
Peugah rijang ubak aku

Insya Allah Po jonjongan
Ban titahan tan meulingkeue
Ulon turot ban nyang kalam
Pakri ban hajat tuanku

Nabi deungo kheun cut bintang
Deungo rijang neukheun laju
Asyhadu alla ilaha illallah
Sulaiman rasulullah

Agama Ibrahim Khalilullah
Jawueub pantaih putroe itu
Jiikrar laju ngon lidah
Ka meutuah bungong meulu

Nabi meuhei laju pantaih
Beuet khuteubah yoh nyan laju
Asap laju beuet khuteubah
Neupeunikah Nabi laju

Putroe Anggor ka jisrah droe
Ka sampoe hajat panghulu
Hingga teuma haba nyang toe
Deungo adoe lon kheun laju

Nabi sinan siploh uroe
Nanggroe nyoe neuboh panghulu
Neuyue seutot ureueng nanggroe
Dum sinaroe woe u leupu

Neuboh raja keu geulantoe
Nabi neuwoe u teumpat laju
Putroe Anggor neuba sajan
U nanggroe Syam keudeh laju

Deungan tandra sikalian
Angen rakhan neuwoe laju
Han jan siat ka troh u Syam
Beurseumayam teumpat dulu

Padum uroe lheueh nibak nyan
Neuhei tukang meuploh ribu
Neuyue peugot saboh meuligoe
Teumpat putroe baro lalu

Utoh bandum ka teurpileh
Siat habeh jipeulaku
Jicat ie meuh nibak binteh
Hitam puteh jipeulaku

Jiboh gamba gajah puteh
Uleue dareh jilab iku
Meuligoe manyang troh lhee lapeh
Hate seudeh watee taeu

Putroe Anggor geuba keunan
Bak rumoh nyan bintang timu
Meusajan deungon gunangan
Uroe malam hate rindu

Teuduek sinan breueh sineuroh
Buleuen peunoh duek di leupu
Jinoe laen ulon teuoh
Bek treb gadoh jeuet keuliru

Ie di laot ulee paseueng
Aneuk udeueng jijak jiwoe
AMMA BAKDU hai nyak buleuen
Deungo lon kheun laen bagoe

Nabi Sulaiman lam keurajeuen
Kayem neulheueng woe bak putroe
Keureuna judo le lagoena
Neuwoe rata jeueb-jeueb putroe

Simalam saho nyan neugisa
Limong reutoh ka ureueng binoe
Bandum judo Nabi Sulaiman
Izin Tuhan dum sinaroe

Putroe Anggor di astana
Hate duka bak siuroe
Teuringat keu du jiraja
Rhet ie mata meuteutaloe

Weueh that hate keu ayahanda
Geunap masa daok jimoe
Lom teuringat keu hareuta
Gob peujeumba dum di nanggroe

Di jih nyoe ho meudiwana
Lom han le ma sinyak putroe
Ma putroe ka treb ka pahna
Hingga teuka bala dudoe

Jimeurawe dalam dada
Hate duka bungong keutoe
Teungoh j̄imoe putroe muda
Teuma teuka iblih pindoe

Peurupa droe ureueng tuha
Ok keupala puteh han soe
Troph keunan bak putroe muda
Jikheun lanja meunoe bagoe

Pakon tamoe meuh geuteumpa
Sret ie mata sangat rugoe
Peugah bak lon hai meutia
Peue beurcinta bungong keutoe

Jawueub putroe nyang jroh rupa
Hai ayahanda ulon dungoe
Teuringat keu du lon raja
Saleh pahna yoh di nanggroe

Du lon gadoh lam prang raya
Tan geugisa dalam nanggroe
Saleh mate di dalam prang
Han lon tuban oh noe uroe

Nyan keu sabab ulon deundam
Beurtangisan hai ayah droe
Adak meunan cut meusubang
Nak bek bimbang bungong keutoe

Gamba ayah tayue rakam
Jeuet tapandang uroe dudoe
Watee nafsu teuka ayah
Jok bagah mat bak jaroe

Jaweueb putroe bungong kipah
Han pat peugah lon di sinoe
Han lon turi tukang gamba
Lon ban teuka lam nanggroe nyoe

Meunyo putroe han taturi
Jeuet po ti ngon tulong kamoe
Ulon tulong putik giri
Bek kiam le bungong keutoe

Jeuet lon bantu cut meusubang
Bek dukaan geunap uroe
Adak meunan wahe ayah
Ta seuleuah keu lon sidroe

Ube patot lon bri upah
Keu peunayah gata sidroe
Ureueng tuha jaweueb pantaih
Keu upah hana lon pakoe

Ulon tulong buet meutuah
Nak bek susah bungong keutoe
Ureueng tuha ploh le baluem
Jiruguem keureutah jinoe

U dalam plok ka jisurung
Meukeuteung su dalam putoe
Teuma jisuet jiboh papeuen
Jidadeueng bak matauroe

Jiboh taloe jiye gantung
Bak cut buleuen jijok dudoe
Seureuta ngon meunoe jikheun
Bek meudieueng bak barangsoe

Nyoe pocut ulon amanah
Bek taubah bangong geutoe
Bek tamungki nyan keu ayah
Le paidah uroe dudoe

**Beuta ngadap oh ta seumbah
Gamba ayah bungong panyoe**
Bak masa nyan putroe indah
Seumbah pantaih le ngon jaroe

Ban jikalon gamba ayah
Hana ubah laku proe
Mangat hate bungong kipah
Hana ayah lom sajan droe

Ureueng tuha pi keumbali
Iblih 'asi ka jiboh droe
Putroe Anggor mangat hate
Tan gundah le laku baroe

Tan jitupeue bungong pade
Lom pi jahe tuan putroe
Nyang tuha nyan tan jituri
Iblih asi jeuheuet tuloe

Putroe baro jiiseulam
Jipeuriwang le jen pindoe
Di putroe hana jituban
Bak jipham sang han mupeue le

Get that jitu'oh ngon jikhadam
Beurang jan didalam peutoe
Beungoh seupot cit jiseumbah
Ban amanah tuha bisoe

Saboh watee hana lupa
Nyan keu gamba ka jipujoe
Teutap po ti lam astana
Anbia ulon hareutoe

Nabi Sulaiman bak sihari
Tron jibrail neujak kheun proe
Meuteumee laju deungon Nabi
Ka jeuet 'asi di meuligoe

Hai Sulaiman pakon lupa
Hana jaga malam uroe
Nyang jarak ek takarija
Nyang kuasa ek taeumpoe

Nyang kreueh œubeueh ek talangga
Nyang leumoh ka han ek pakoe
Kumeung jak meurandeh laot
Deuh beusot takalon keudroe

Nyang gajah jak lam seulimbot
Hana tadhot tatem iem droe
Meung taiem han tapeukeujot
Dudoe jibet dum meuligoe

Tajaga na beungoh seupot
Gajah jilob dalam peutoe
Nabi deungo jikheun jibra-i
Tan keutahui ulon sidroe

Meulainkan nyang leubeh tukri
Allah rabbi nyang po kamoe
Meunan neukheun uleh Nabi
Lom jibra-i peugah jinoe

Meuploh laot tajeumeurang
Meuribee blang pi tapeutoe
Kafe jarak habeh taprang
Nyang di dalam ka taiem droe

Lheueh neukheun nyan ka neugisa
Di anbia laju neuwoe
Oh troh keudeh lam astana
Neukheun lanja ubak putroe

Ka neutanyong ubak nisa
Ho ka gamba po sambinoe
Ho ka patong ayah gata
Jak boh sigra bek le sinoe

Boh u laot wahe po ti
Bek le 'asi gata putroe
Bak masa nyan tuan siti
Teungoh beureuhi lom ka paloe

Lah jitakot that keu Nabi
Meunyum that gli po sambinoe
Na cit bacut jawueb jibra-i
Wahe duli deungo lon nyoe

Keureuna lon rusak hate
Bek meusyawe keudeh keunoe
Bak ulon peulale hate
Bek rusak le tuan ku droe

Han jeuet putroe bak agama
That meulingga meunan bagoe
Nibak Tuhan salah raya
Lam neuraka teuma dudoe

Agama iseulam suci raya
Lon peulara malam uroe
Meung han tapateh putroe muda
Keunong paksa nibak kamoe

Gata pocut that lon gaseh
Bek peujaeh nama lon nyoe
Oh lon teugah beutapateh
Bek seuliseh gata sidroe

Hana taeu uleh gata
Padum na kha gob nyan sidroe
Geueh mantong dalam hawa
Jinoe ho ka raja nanggroe

Hana kapateh lon bri aja
Angen raya troh jak eumpo
Tandra ulon ka talihat
Kuasa that Tuhan sidroe

Sigom alam nyata kudrat
Han kiamat droe neuh sidroe
Putroe deungo Nabi bantah
Jicok bagah laju keudroe

Jiyue jak boh pantaih-pantaih
Patong ayah dalam sungoe
Ka jiboh hana le jituen
U dalam krueng jisrom dudoe

Hana jithee bungong seupeueng
Jeuet geubulueng ngon gamba nyoe
Adak jithee jeuet geubulueng
Hana jituen yoh saboh roe

Habeh haba saboh kalam
Oh noe diam buet cut putroe
Jipot angen timu laot
Bakat jigrob troh lam sungoe

Nabiullah ulon seubut
Seun siatet lon hareutoe
Bak simalam Nabi Sulaiman
Duek seumanyam deungon putroe

Cong kurusi nyang eumasan
Ngon deundayang dum sinaroe
Teuma teuka saboh beulalang
Daruet canggang bangsa jih nyoe

Ubak Nabi jiteureubang
Di hadapan jidong sidroe
Dua sayuep le jibuka
Ngadap raja jitundok droe

Laju jikheun ya maulana
Teurenanya ngon bangsa droe
Nabi kheun peue teurenanya
Peue keureuna cuba kheun proe

Toh lawankah kapeuhaba
Mangat sigra kuhei keunoe
Beulalang kheun lagee nyang ka
Teurenanya bak bangsa droe

Kheun Nabi soe nyang enanya
Kakheun sigra kuhei keunoe
Lom haba sot daruet kata
Sikrak haba lagee bunoe

Putroe kheun bak Nabi
Daruet ini bah keu kamoe
Neubri keu lon ya habibi
Heundak kami pajoh asoe

Kon jeuet pajoh hana larang
Kheun jonjongan halal jih nyoe
That halal meunyo beulalang
Miseue ikan dalam sungoe

Putroe drob le nyan beulalang
Jibakaran laju keudroe
Han jan masak ka jipajoh
Hingga jatoh jeuet keu rugoe

Silab Nabi nyan be haloh
Hingga roh nibak meupaloe
Keureuna daruet jak meungadu
Hana glah su jihareutoe

Ka jipajoh le cut meulu
Kheundak gafur Tuhan sidroe
Hingga uroe pi ka pagi
Neujak Nabi bak teumpat droe

Duek bak tahta cong kurusi
Kanan kiri wazi meuntroe
Tren firman nibak Rabbi
Jibrail nyang jak peugah proe

Kahei daruet kajak kheun ban
Beulalang jijak peugah proe
Trok bak Nabi jika karam
Hana neutham buatan putroe

Saboh daruet geukheun nyoe ban
Nabi Sulaiman laju bunyoe
Limong reutoh judo Sulaiman
Ban bandum nyan geukheun putroe

Laen gundek ngon deundayang
Izin Tuhan dum sinaroe
Gundek Nabi tujoh reutoh
Jroh seumeuloh ureueng binoe

Bandum jroh kulet haloh
Bangsa tanggoh droe sinaroe
Niet Nabi mangat le aneuk
Neumeung seupreuek jeueb-jeueb nanggroe

Rata donya neumeung yue duek
Bek meusireuek le hukom nyoe
Beukuat agama Iseulam
Meunan kadang Nabi geutanyoe

Oh jan mate po jonjongan
Na soe peukong dum sinaroe
Meunan niet Nabi Sulaiman
Kheundak Tuhan hana sampie

Cinta Nabi hana peunoh
Keu Tuhan goh neupeusampe
Geulantoe droe goh lom meuoh
Aneuk nyang jroh goh na meusoe

Bak siuroe Nabi Sulaiman
Sang dukaan meunan bagoe
Neupeugah droe ubak Rakhan
Aneuk badan nyang bak putroe

Neuyue jaga sikalian
Kadang pajan droeneuh paloe
Kadang mate keheundak Tuhan
Meunan neupham lam hate droe

Hate Nabi meunan macam
Sang seuleundang droeneuh sidroe
Bak teuduek nyan rindu deundam
Jonjongan teupike keudroe

Teuma lheueh nyan po jonjongan
Jak u peukan keumala nanggroe
Ka biasa barangkajan
Na deundayang sabe sidroe

Jijak me ie barang kajan
Mat euncien jih nyan sidroe
Tiep-tiep watee jak u peukan
Euncien bak tangan ureueng bunoe

Saboh rawi aneuk agam
Aneuk jonjongan cit na sidroe
Jih nyang mat euncien malakat
Kada hajat Nabi sidroe

Bak uroe nyan keheundak Tuhan
Ban dua tan keunan sampoe
Ban dua droe goh lom datang
Na di dalam goh troh keunoe

Nabi arat jak u peukan
Hana datang ban dua droe
Astarukhi biek jen suang
Jibeurlalan keunan sampoe

Peurupa droe ban deundayang
Tima sajan mat bak jaroe
Di Nabi hana pareksa
neusuet lanja malakat nyoe

Ka neujok bak siceulaka
Neuraba tima bak jaroe
Neutamong u dalam kama
Di lua Astarukhi nyoe

Nabi teungoh kada hajat
Jipeuteupat afeurit nyoe
Laju jiwoe ubak teumpat
malakat ka na bak jaroe

Peukayan Nabi jingui leugat
Jeuneh alat dum sinaroe
Jiduek laju atueh tahta
Tan soe sangka pi meusidroe

Troh le keunan tuha muda
Ngadap raja dum sinaroe
Bakjisangka nyo keuh Nabi
Tan peurati dum sinaroe

Tan jitupeue ka jitaki
Astarukhi afrit pindoe
Astarukhi mat keurajeuen
Hukom ureueng dum jeueb sagoe

Teutap jih ka jimat mideuen
Afeurit bajeueng paleh han soe
Bukon sayang cicem hujeuen
Jatoh eumpung sret u bumoe

Sayang Nabi meuteueng bayeueng
Ka jicukeueng le jen pindoe
Nabi pi lheueh kada hajat
Teubiet leugat keumala nanggroe

Wie ngon uneun Nabi lihat
Han le sapat ureueng binoe
Bak masa nyan nabi Sulaiman
Kheundak Tuhan ka meupaloe

Laju ubah deungon rupa
Han le cahya lagee baroe
Sabab hana le mahkota
Gadoh rupa keumala nanggroe

Teuma neuwoe u astana
Ubak nisa tuan putroe
Ka neutanyong ho dendayang
Ho jime nyan euncien kamoe

Putroe deungo kheun Sulaiman
Ka jipandang le ureueng nyoe
Geukheun droe Nabi Sulaiman
Jidhot yoh nyan uleh putroe

Pane gata keunoe datang
Peue habaran tahareutoe
Ka neujaweweub lon nyoe Nabi
Pakon po ti tadhot lon nyoe

Judo gata lon hai nyak ti
Pakon keuji atueuh kamoe
Oh jideungo haba judo
Ka jitajo jimeung eumpoe

Ka jitulak ngon meuhubo
Troph bak pinto po samlakoe
Teubiet keudeh mate geucang
Sangat reumbang aneuk bisoe

Peugah droe Nabi Sulaiman
Beurati nyan han thee keudroe
Ka jiuse bek didalam
Jak u blang nyang goh kueumpoe

Kakheun droe Nabi mate geucang
Weh rijang yoh goh kuseudoe
Nabi jeh pat atueuh tahta
Mat neuraca deungon meuntroe

Teungoh hukom dum sigala
Marga satwa dalam nanggroe
Jawueub Nabi nyang mulia
Bek tasangka dum sinaroe

Nyoe lon Nabi tapeucaya
Ho seedara tahei keunoe
Ho euncien lon ka jibawa
Pulang sigra hareuta kamoe

Maken neukheun meunan haba
Jidhot lanja uleh putroe
Bek le haba hai cilaka
Bek kutala ngon seuligoe

Ubak namiet ka jipeugah
Ka let pantaih keunoe bek toe
Namiet cok le kayee teuplah
Jibot pantaih jimeung kiloe

Nabi teubiet yoh nyan bagoe
Ubak Allah ka neukheun droe
Neutupeue droe keunong bala
neujak lanja laen sagoe

Rumoh laen ka neugisa
Neuheu nisa lagee bunoe
Jitanyong soe jeh di lua
Peue haba ka jihareutoe

Nabi seuot lon Sulaiman
Wahe bintang lon ka lon woe
Putroe ngo jikheun Sulaiman
Beudoh rijang jak kalon proe

Oh jikalon laen macam
Ka let rijang keunoe bek toe
Saleh pane siblang kapang
Beurani nyan kheun Nabi droe

Ka jiyue let sinan laju
Geubalu bek jan jikheun proe
Jicok kayee jimeung indru
Nabi lalu ka neuboh droe

Neukeulua yoh nyan laju
Tinggai lepu ngon meuligoe
Rhet ie mata ngon meu'u-u
Ka neulalu jeueb-jeueb sagoe

Ho nyang jijak ka meusagang
Bukan sayang keumala nanggroe
Oh hana malakat sajan
Ka hilang pangkat saboh roe

Oh neupeugah droe neuh Nabi
Jimeung tadi ngon-ngon tungoe
U bale neumeung peureugi
Di sinan pi jikeumeung seudoe

Ka jihila le pahlawan
Sangat reumbang geupab binoe
Jiparoh ulua kawan
Hai langkapang bek le sinoe

Saboh rawi meunan macam
Saboh kalam meunoe bagoe
haba nyan na dua macam
Bandua nyan jeuet ta pakoe

Saboh haba Nabi Sulaiman
Jonjongan nibak siuroe
Neubeurangkat dalam awan
Angen rakhan nyang peusampoe

Meusu bunyoe dalam awan
Meurang-rang keunoe u bumoe
Meulayang bak bineh pasi
Su bunyoe meuribee bagoe

Sang suara geundrang ngon rapai
Sang keucapi meunan bunyoe
Taloe pasi bak uroe nyan
Le di sinan agam binoe

Jak meuramien inong agam
Meukeukawan dum sinaroe
Teuka sidroe aneuk pawang
Badan hitam miseue tungoe

Jih nyan dara mantong seudang
Rupa jih nyan ban that ragoe
Jeuet peugah jeuet masok kawan
Saleh hitam kulet asoe

Jieue tandra dalam awan
Jideungoran nyan u bumoe
Ka jitanyong ubak rakan
Peue bunyoe nyan mangat tuloe

Dara laen seuot rijang
Tandra Sulaiman su meubunyoe
Nyankeuh raja nyang keusaran
Dalam alam diateueh bumoe

Ka jiseuot aneuk pawang
Nabi Sulaiman judo lon nyoe
Nyan judo lon wahe po da
Dudoe teuka ubak kamoe

Dara laen deungo haba
Jikheun sigra dum sinaroe
Bandum inong ka teurtawa
Jikheun sigra meunoe bagoe

Pakri ka jeuet meunan kata
Wahe dara nyang seureuloe
Kamoe laen get nibak kah
Han meujeuet peugah peuleumah gigoe

Kon got kamoe meunyo ngon kah
Han meupeugah meunan bagoe
Han kathee droe nyang kalang ruet
Pakri kajeuet kakheun lakoe

Dum rupakah buju tirut
Ngon raya pruet meuek gigoe
Beurani ka meuseulaweuet
Dara karot han thee keudroe

Seunurat tan pakri ka beuet
Han kasifeuet bak tuboh droe
Kamoe laen jroh cit bacut
Han cit meujeuet kheun nyan lakoe

Nabi Sulaiman na katuri
Nyan keuh Nabi mat donya nyoe
Gaseh Allah kuasa Rabbi
Jen ngon pari ek meutusoe

Peurumoh neuh limong reutoh
Jroh seumeuloh bandum putroe
Aneuk raja tanggoh-tanggoh
Dum keunan troh jijak jok droe

Dum rupakah hana tukoh
Bui meuregoh jeuet keulakoe
Aneuk dara seuot sigra
Peue poh gata nyan keu kamoe

Dilon lon kheun kon seungaja
Keulua bak lidah keudroe
Kon lon kheun keu galak-galak
Hana layak lon hareutoe

Cit meunggata nyang na layak
Lagi rancak hana bagoe
Pangkat di kah lom ngon kaya
Le hareuta jeueb-jeueb sagoe

Nyan lakoe kah kon biek seedaga
Biek lhab ija ngon on panjoe
Nak rugoe kah lon meututo
Jeuet a-o deungon kamoe

Bak masa nyan karab a-o
Ka jitajo tuha sidroe
Jipeuseungab teuma laju
Bek le 'a'u aneuk bisoe

Ka jipinah saboh saho
Jak lam rabo keudeh jinoe
Pade gob meututo digob
Po nyoe rob meusunoh lakoe

Adak takheun nyan tameutob
Sulaiman got judo putroe
Hingga seungab le bandua
Geumeugisa le meuwoe-woe

Teuduek haba sinyak dara
Pucok donya ulon kheun proe
nabi Sulaiman dalam hawa
Troph neubungka saboh nanggroe

Leumah neueu sungoe raya
Nabi teuma tron u bumoe
Neumeung manoe hugob raya
meunan cinta nabi sidroe

Ie pi jroh that hana tara
Hu meucahya jeuet talhoh droe
Neusuet incien keubah lanja
Ateueh tahta bak neuduek droe

Nabi neutron lam sungoe raya
Manoe lanja dalam sungoe
Deungon rakan dum sigala
Seureuta peurdahna meuntroe

Lale Nabi neumeuupa
Ngon lasyeuka dum sinaroe
Astarukhi jen cilaka
Laen pi ka aneuk bisoe

Jimeung tipee po jonjongan
Jijak yoh nyan laju sidroe
Incien Nabi jicok yoh nyan
Sok bak tangan rimueng seudoe

Laju jipo dalam awan
Jiteureubang woe u nanggroe
Nibak tahta keurajaan
Ngui peukayan keumala nanggroe

Habeh jingui sikalian
Peukayan Nabi saboh roe
Jihukom le bandum rakyat
Kri nyang hajat ban nafsu droe

Han soe turi hansoe sasat
Bandum ngadap jih nyan sidroe
Teutap jih di atueuh tahta
Jimat donya dum sinaroe

Musem hujeuen cangguek subra
Cicempala tron jak manoe
Nabi Sulaiman lheueh meuupa
Teungoh lanja dalam sungoe

Rakan han le dum simua
Han meuhoka dum sinaroe
Neuriwang bak teumpat nyang ka
Han le'tahta nibak bunoe

Yoh masa jicok malakat
Gadoh leugat dum sinaroe
Rakan-rakan dum ka leunyap
Bandum meuhat angen puwое

Keureuna hana le nyan malakat
Mukjizat han le sinoe
Nabi Sulaiman jatoh hina
Kada kadar Tuhan sidroe

Kheundak Tuhan han soe sangga
Nyang mulia hina jinoe
Yoh nyan Nabi neubeurangkat
Timu barat jeueb-jeueb sagoe

Ka geucré ngon rakan sahabat
Ka keuh troh had bak uroe nyoe
Sabab bacut Nabi mulia
Murka bak Tuhan sidroe

Cit bak inong dum binasa
Ube seuma asai peue roe
Masa Adam buatan Hawa
Teuka duka Adam dudoe

Hai seedara tuha muda
Adam dara dum sinaroe
Ka tadeungo haba Nabi
Ube biji ek cit paloe

Meung geutanyoe apa lagi
Kon be guni buatan sidroe
Peuet ploh paleng ubit
Nyang paleng dit dum sidroe-droe

Han cit tathee droe watee meugriet
Tapeugah mit cit deesa droe
Di Nabi nibak sigeutu
Gaduh leupu deungan nanggroe

Sabab nibak sinyak meulu
Meungadu daruet saboh roe
Jipajoh le putroe meulu
Ngon nyan laju teuka paloe

Jibrail nyang jak kheun laku
Panghulu baru neuthee droe
Ka neuthee droe kheundak Allah
Ban peurintah po geutanyoe

Beuragoe kupiah mirah
Bajee jubah nibak asoe
Nabi Sulaiman Rasulullah
Neucok langkah tinggai nanggroe

Tinggai gampong ngon dairah
Tinggai syaukah ngon meuligoe
Ka neujak jeueb-jeueb simpang
Neujeumeurang jeueb-jeueb nanggroe

Neujak bak Masjidil Haram
Neuseumbahyang laju sidroe
Dua uroe neudom sinan
Neubeurjalan teuma dudoe

Pruet neuh ka deuek bak masa nyan
Hana makan ka lhee uroe
Ka neutamong dalam gampong
Jeueb-jeueb ujung neujak sidroe

Soe meuteumee neulakee tulong
Pruet neuh busong hana asoe
Jijawueub jroh hai seedara
Di lon pi ka dua uroe

Aneuk-aneuk ka lhok mata
Deuke lagoena gampong kamoe
Bek antara bri keu gata
Keu droe hana pakri bagoe

Sangkira na hai seedara
Lon bri sahja bah bek gantoe
Neuwoe sinan lom neubungka
Meuraba jeueb-jeueb sagoe

Oh hana meuteumee makeuen
Han cit meunyum le nibak droe
Neupuasa hantom neulheueng
Khueng ngon hujeuen pi saban roe

Dum nan seksa ka neuteumeung
Hana meunyum pucok nanggroe
Bak Allah neupulang bandum
Han mubayang meudeh meunoe

Hana bacut hate peudeh
Han seuliseh lam hate nyoe
Nabi neujak keunoe keudeh
Sangat jaeh jeueb-jeueb sagoe

Sidroe ureueng han jigaseh
Kaom wareh han le meusoe
Rhet Nabi u nanggroe laen
Lua iklim ngon neumat droe

Troh u pasi Nabi neutron
U yub aron ka neupeutoe
Neueu ureueng sinan le that
Teungoh mupukat rab cot uroe

Nabi neujak le keunan rab
Neukheun leugat meunoe bagoe
Wahe teungku pawang pukat
Lon na hajat nibak buet nyoe

Neupeuroh lon jeuet keu rakan
Jeuet keu teelan teungku sinoe
Ka jiseuot laju pawang
Meungnyo rakan han jeuet jak woe

Hana jeuet tадом di gampong
Tho pusong pukat mupaloe
Ie paseueng kayem meuek tron
Oh ngob peusong jroh seureuloe

Meung ka tho han jeuet le tatron
Nyan na muphom nyang lon kheun nyoe
Nabi peugah jroh that meunan
Ulon tuan beujeuet sidroe

Keu upah lon tan hajatkan
Padum pawang bri keu kamoe
Kheun pawang padum kheun gata
Lon bri sahja meungtatem roe

Jaweueb Nabi oh mumada
Keu lon dua ikan tangiroe
Lom jijaweeub pawang pukat
Ka keu jroh that nibak kamoe

Boh jak keunoe laju leugat
Tarek pukat keu ngon kamoe
Teuma Nabi laju peurab
Neumat pukat cula caloe

Uroe nyan laju keurija
Songgoh raya keumala nanggroe
Pawang kalon jeumot raya
Lam dada geusayang jinoe

Teuka sayang dalam dada
Jipeulara po samlakoe
Oh ka habeh lheueh keurija
Eungkot dua jipeujaroe

Nabi neuduek diyub kayee
Neumeusilee nibak uroe
Neutot eungkot neuplah kayee
Oh ka mubee pajoh dudoe

Pajoh saboh tinggai saboh
Keusingoh Nabi hareutoe
Peuduek sinan hana rumoh
Seupot beungoh sinan sidroe

Oh troh watee seumbah Allah
Murakabah pucok nanggroe
Muka Nabi pi ka ubah
Keunong beukaih matauroe

Jeuet le kude timoh barah
Kheundak Allah meunan bagoe
Bak pukat kayem han leupah
Mata bilah gaki jaroe

Bit pi saket nyan di Nabi
Tan paduli saket jaroe
Laloe deungon pujoe Rabbi
Zat ilahi nyang neupakoe.

Han tom lupa meung sihari
Barah kude jiduek keudroe
Teiduek siat haba Nabi
Lon peugah kri ubak baroe

Ceudah-ceudah cicem nuri
Nyang ahli tok-tok beuragoe
Meuriwang bak Astarukhi
Jen asi yoh nyan mupaloe

Jimupakat meuntri-meuntri
Ka jituri aneuk bisoe
Jikalon buet han le meukri
Hukom jibri le that bagoe

Hana le laku buet Nabi
Kitab suci han jipakoe
Kitab Taurit dijih banci
Kitab asi jihareutoe

Kitab nibak raja Anggor
Nyan jihato geunap uroe
Nyang meunang dum jipeutalo
Le that 'a-'o ureueng nanggroe

Jarak that deungon buet Nabi
Ka jituri uleh meuntroe
Asap Khaba sangat ahli
Ka jikheun kri meunoe bagoe

Ka takalon ngon peurati
Buet Nabi dilee saboh roe
Na macam nyoe hukom Nabi
Cuba kheun kri ubak kamoe

Teuma seuot dum sigala
Buet enanya hana meunoe
Mubalek that dum simua
Hantom na nyang meunoe bagoe

Adak meunan hai seedara
Jak u lua nak tamuproe
Hingga teubiet dum sigala
Perdahna ngon wazi meuntroe

Duek meusapat tuha muda
Asap buka le haba nyoe
Nyang duek nyan diateueh tahta
Kon enanya aneuk bisoe

Astarukhi jen cilaka
Buet enanya jipupaloe
Nabi Sulaiman ka binasa
Jipeudaya le si anoh nyoe

Jinoe tabeuet kitab Taurit
Mangat meugriet aneuk bisoe
Meunyo jen laju teugeutib
Jiteubiet dalam makam nyoe

Meunyo Nabi leubeh suka
That mulia keu kitab nyoe
Ngon nyan talet siceulaka
Nak jibungka aneuk bisoe

Meunan pakat dum simua
Lam rahsia dum sinaroe
Tan jituh le sicilaka
Pakat sama wazi meuntroe

Haba meuntroe teuduek siat
Lon hikayat bak sot bunoe
Musem timu tamupakat
Musem barat tabloe publoe

Nyang jeumot laju hareukat
Nyang peusapat ureueng ragoe
Ureueng lisek nyang peusapat
Jeueb-jeueb teumpat jeueb-jeueb nanggroe

Haba hikayat muwoe gisa
Ku enanya ulon pakoe
Ka treb bunoe putoh haba
Ngon beurata lon hareutoe

Nabi Sulaeman ka meularat
Bak pukat kayem han toe
Jaro gaki luka ka brat
Han jeuet neumat cok jeunaloe

Di pawang pi han jipaksa
Jieu luka gaki jaro
Nyang upah sabé jikira
Beuthat hana buet tiep uroe

Oh seupot sabé jiteuka
Eungkot dua geunap uroe
Nabi neueh di yub kayee
Droe neujamee rakan han toe

Peuet ploh uroe ka panghulee
Yub kayee hana soe peutoe
Bak siuroe aneuk pawang
Nyang hitam dilee saboh roe

Nyang kheun di lee nyang jonjongan
Nyang meukalam jikheun lakoe
Rupa pi brok jih pi hitam
Jime apam keu ayah droe

Teungoh jijak deuh jipandang
Diyub asan ureueng sidroe
Sinan teungeuet sang-sang pangsan
Keunong badan matauroe

Di geunireng saboh uleue lhan
Jipeugang sion kayee nyoe
Jipupayong ureueng eh nyan
Bek that bandrang matauroe

Sidara nyan le peurati
Jibeurdiri sinan rab toe
Na sikeujab jipeurati
Jipeureugi laju sidroe

Troh bak ayah ka jikheun kri
Wahe abi nyang eh jeh soe
Kheun ayah keupeue kasudi
Nyan kuli ureueng geutanyoe

Kawan pukat baro teuka
Tan keulua ka lhee uroe
Jih saket kude ngon luka
Han jeuet keureuja deungon jaroe

Adak meunan hai ayahanda
That mulia nyang ureueng nyoe
Pakri kakheun na bahgia
Peue nyata ka kaeu bunoe

Masa troh lon keunan langkah
Lon kalon draih ngon matauroe
Gob nyan teungeuet sinan reucah
Uleue juwab disinan toe

On kayee sion dibabah
Jikipah ureueng teueh nyoe
Sampoe jinoe wahe ayah
Uleue juwah na sajan droe

Kheun pawang bit nyan ka peugah
Deumi Allah kheun dara nyoe
Jeuet ayah neujak peurati
Peureugi jak kalon bagoe

Pawang deungo kheun si budi
Jipeureugi kalon bagoe
Oh troh keunan jipeurati
Uleue tadi mantong cit toe

Uleue lhan nyan mantong sinan
Pawang nyanjisurot jiwoe
Teuka pike peue ureueng nyan
Han tom meunan nyang ka proe

Tanyong aneuk ubak ayah
Pakri kisah ayah kamoe
Peue na nyan ban lon peugah
Seuot ayah bit aneuk droe

Meunyo meunan wahe ayah
Neupeunikah deungon kamoe
Bah meukude mata bilah
Di ulon bah ku meulakoe

Ngon soe laen hana nafsu
Nyan keuh hai du di lon lakoe
Teungoh meututo aneuk ngon du
Ka troh ibu keunan sampoe

Pawang kheun hai ma sinyak sy'ueng
Bah le tatueng si upah nyoe
Tapeukawen ngon sinyak sy'ueng
Bah that ureueng han tatusoe

Kheun isteuri laju teupat
Cit jroh that haba droe neunyoe
Peue ka mabok pajoh madat
Pakon silab gata sidroe

Peue disinoe hana ureueng
Jeuet keutatueng han meusoe-soe
Kuli-kuli takeumeung tueng
Singoh gob kheun teulah dudoe

Teuma pawang meunoe jikheun
Le cit ureueng lam nanggroe nyoe
Keupeue ureueng meuploh laksa
Akai bicara hana sidroe

Dilon kon kukalon bangsa
Ku mita nyang baek bude
Han ku harap keu gob kaya
Meung hareuta le cit bak droe

Nyang ku mita budi bahsa
Bah brok rupa cit jroh dudoe
Tan kuminat jeuet keu raja
Hana kada bak geutanyoe

Aneuk geutanyoe pi ka raya
Sidroe hana ureueng pakoe
Hana sidroe ureueng mita
Peue preh teuma bek na lakoe

Teuma jawueeb lom isteuri
Ban keutahui gata sidroe
Han ku tuoh han kutukri
Ban nyang kri bak gata jinoe

Pakri hajat pubuet laju
Bek le karu deungon kamoe
Asai bek jeuet le keu a-u
Bek salah du gob hareutoe

Teungoh meututo po lem pawang
Nabi Sulaiman jaga dudoe
Ka neubeudoh po jonjongan
Lam beurawang neujak sidroe

Jak tueng wuduk neuseumbahyang
Ka luho nyan matauroe
Lheueh seumbahyang na keuh siat
Pawang pukat keunan sampie

Troh bak Nabi geuduek leugat
Geukheun teupat meunoe bagoe
Jinoe gata bek meularat
Tamupakat jeuet keu rugoe

Makeuen minom sang payah that
Hana mupat han meuho roe
Woe nibak lon keudeh leugat
Kubri teumpat nyang meubudoe

Kutueng gata keu meulintee
Asoe juree di meuligoe
Meunyo tatem kheun beuteuntee
Bek ta malee deungon kamoe

Ka neujawueub le panghulu
Peue laku nyan han patot roe
Peue droeneueh hana malee
Siplah kayee meulintee droe

Jeueb-jeueb sagoe ureueng upat
Pawang pukat buta tuloe
Han jituri timu barat
Geucok leugat baranggasoe

Ngon meukude mata bilah
Situeng upah meulintee nyoe
Pawang pukat jawueub pantaih
Tan kupeugah meunan bagoe

Haba nyan tan kuyue peugah
Nyang kukisah haba jak nyoe
Haba kutueng nyang kupeugah
Kupeunikah ngon aneuk droe

Tatem ngon han nyan keuh sagai
Sigala hai kutupeue roe
Lon nyoe gohлом gadoh akai
Gohлом kanjai siumu nyoe

Nabiullah lom beurkata
Sang kon jeumba ulon teuh nyoe
Lagi lon hana hareuta
Tan beulanja ureueng binoe

Lon hareukat tiep-tiep hari
Pawang bri dua tangiroe
Toh di lon toh keu isteuri
Peue ulon bri susah dudoe

Kheun pawang kon nyan kusudi
Kutanyong kri haba bunoe
Tan kutanyong bhaih hareuta
Han ho kuba dum sinaroe

Jeh pat bak lon na di tangga
Padum suka gata sidroe
Asai tatem nyang kupeugah
Pukat lhee blaiah keu gata roe

Dalam peutoe dum meuh mirah
Blang nyang luah na di nanggore
Teuma neukheun uleh Nabi
Ban kheundaki pawang kamoe

Han jeuet malee deungon keuji
Tatukri le gata sidroe
Habeh haba nibak Nabi
Pawang peureugi laju geuwoe

Geupileh ureueng nyang baek
Sinyak cantek geubri lakoe
Geupeuwoe Nabi dalam bielek
Han le geusek laba rugoe

Peunikah laju deungon Nabi
Sinyak ti laju peujaroe
Ka neukabui uleh Nabi
Sinyak ti ka milek kamoe

Di Nabi pi hate suka
Ka na nisa bak uroe nyoe
Teutap hate han le duka
Duek di tangga geunap uroe

Hana le geujak bak pukat
Neuduek teutap ngon judo droe
Tiep uroe Nabi ibadat
Hana silab meunan bagoe

Beuthat hana jak keureuja
Geubri jeumba le pawang nyoe
Peue lom jinoe ka di rumoh
Cit nyang jroh-jroh nyan geupuwoe

Cit geukira seupot beungoh
Geuuroh watee geupuwoe
Padum uroe lama masa
Meugah teuma jeueb-jeueb sagoe

Aneuk pawang judo ka na
Ureueng teuka ban troh keunoe
Dara dilee nyang meudakwa
Keunan teuka bak dara nyoe

Meuteumee ngon dara hitam
Aneuk pawang nyang saboh roe
Dara le le tanyong rijang
Raja Sulaiman ka troh geuwoe

Ka kawen kah ngon Sulaiman
Ka peugah nyan di kah lakoe
Kah judo raja Sulaiman
Ka kheun meunan yoh saboh roe

Jaweueb dara aneuk pawang
Cit tapandang teuma dudoe
Bit raja nyum bukon raja
Nyang neumeusa judo lon nyoe

Lon meututo tan biasa
Kon lon sahja ngon kheundak droe
Kheundak Tuhan lon beurkata
Lidah hana lon neuloe-loe

Aneuk dara meunan jikheun
Seuot bandum dara bunoe
Sira jiwoe meunoe jikheun
Dara bajeueng han thee keudroe

Jimeupayah nyan jijak kheun
Bak jipeunyum jih han rugoe
Mangat malee aneuk pawang
Meunan jipham dum sinaroe

Beurijuek dong di cong ara
Cicempala di cong panjoe
Teuduek siat sinyak dara
Lon calitra laen jinoe

Astarukhi lon peugisa
Duek bak tahta geunap uroe
Hukom rakyat tuha muda
Kon ban nyang ka dilee proe

Asab Khaba dum sigala
Ka lheueh bicara dum sinaroe
Kitab Taurit bandum rata
Cit ka geuba geunap uroe

Bak uroe nyoe phon geubaca

Tango subra dum sinaroe
Bandum jibeuet di nab raja
Jen cilaka hate ka dhoe

Teuka puseng le ngon ulee
Hingga layee gaki jaroe
Bak jipike han le laku
Beudoh meupru aneuk bisoe

Ho nyang jipo meuantok ulee
Sang ka lahee meunan bagoe
Gaduh akai aneuk asee
Ka jikacie aneuk bisoe

Teuma jipo le u laot
That teumakot iblih pindoe
Maken jipo ngon meugob-gob
Sang-sang ka rhet jih u bumoe

Jih pi leumoh kuweut atot
Rab lupot aneuk bisoe
Bak jipike han le reumbang
Jih nyan datang jeuet meupaloe

Jisuet euncien nibak tangan
Jisrom yoh nyan lam laot nyoe
'Oh hana le euncien bak tangan
Jih ka karam aneuk bisoe

Jiboh droe u gunong hitam
Bek soe tuban ka jiboh droe
Malakat rhet ka meulayang
Suroh Tuhan teuma dudoe

Bak eungkot peurintah Tuhan
Neuyue peureulan malakat nyoe
Oh lheueh ji'uet uleh ikan
Jibeurjalan le eungkot nyoe

Teuma dudoe roh lam pukat
Bak teumpat Nabi Sulaiman jinoe
Roh bak pukat tuan di Nabi
Dipuwoe le u rumoh droe

Keu meulintee laju jibri
Jimeuheu le nyan aneuk droe
Nabi peugah bak isteuri
Ikan anoh nyan na asoe

Peusieng beuget nyan hai nyak ti
Beatalili dalam pruet nyoe
Le peurumoh jiplah dua
Leumah cahya pruet eungkot nyoe

Jikuak laju jibuka
Deueh nyata malakat pude
Ban jimat jikalon rupa
Limpah cahya le rumoh droe

Judo Nabi laen kira
Keu banda jimeung bri jinoe
Jiingat takot murka
Beungeh teuma kadang lakoe

Beungeh lakoe darohaka
Jeuet keu bala raya dudoe
Bah kubri thee ubak teungku
Bek jeuet karu teuma dudoe

Teuma jijak ubak teungku
Jijok laju le euncien nyoe
Nabi kalon nyan malakat
Neumeungucap panghulee nyoe

Astagfirullah neukheun leugat
Tuhan intat lom bak kamoe
Nabi sambot yoh nyan leugat
Malakat neusok bak jaroe

Lheueh neusok euncien malakat
Neukheun leugat bak ureueng binoe
Hai isteuri nyang meutuah
Nyoe lon peugah po sambinoe

Nyoe keuh ulon hamba Allah
Nyan meugah masa di nanggroe
Nyang geukheun raja Sulaiman
Rasul Tuhan nyoe keuh kamoe

Baroe kon nekmat ka hilang
Jitawan uleh jen pindoe
Bak uroe nyoe Tuhan pulang
Ka meuriwang lom bak kamoe

Lheueh neukheun nyan po jonjongan
Ubah yoh nyan rupaneuh nyoe
Jiek cahya ka trang bandrang
Ngon peukayan pi ka sampoe

Ngon ceumeuti laju datang
Angen rakhan laju sampoe
Judo Nabi pi ka ubah
Sangat ceudah bak uroe nyoe

Kulet puteh ban keureutah
Buleuen peuet blaih ka tiwas roe
Pawang kalon aneuk badan
Rupa na ban buleuen uroe

Jieu meulintee ka meughahan
Nabi Sulaiman baro meusoe
Nabi Sulaiman lahe nyata
Uroe nyoe ka deuh lam nanggroe

Dum hamparan laju teuka
Sigala peurdahna meuntroe
Raja sidom yoh nyan teuka
Di jih jiba bungong jaroe

Pha daruet na siblah jiba
Me keuraja nyang bumudoe
Tron jibra-i bak anbia
Neupeuhaba hai raja nyoe

Hai Sulaiman po mulia
Nyan keuh raja nyang mubudoe
Yoh nyan Nabi po mulia
Neucok raja laju keudroe

Taloe sidom jroh seutia
Jak bak raja bungong jaroe
Nabi peuduek atueuh tahta
Jroh mulia hana bagoe

Pawang pukat galak raya
Le hareuta hana bagoe
Han jan siat gob nyan kaya
Meuh suasa sarat peutoe

Meulintee geuh nyoe bit raja
Kheun haba bak ureueng binoe
Aneuk geutanyoe bit meutuah
Hana salah ban jikheun proe

Meung han kutem ban jipeugah
Raya teulah hana bagoe
Narit gata meunyeusai that
Tuto cakap sangat rugoe

Nyan ka taeu ban ku hajat
Nyang na silab ku uroe nyoe
Cit gata nyang sangat silab
Sabe cakap jeuet keu rugoe

Tameung han tueng uleh gata
Lah kreuh raya ulon sidroe
Han kupateh narit gata
Kutueng lanja nyan ureueng nyoe

Meunan narit pawang pukat
Laju seungab ureueng binoe
Bandua droe hate seuu
Geueu laku meulintee droe

Neueu aneuk ka cahya hu
Ban keululu cahya soe bri
Yub ngon atueuh peukayan hu
Bri Tuhanku nyang that gani

Baroe hitam nyoe ka puteh
Bintang mureh nyang saban roe
Hana ngon sa tameung pileh
Tuhan gaseh keu geutanyoe

Di Nabi pi get neugaseh
Hate puleh bak inong nyoe
Teuduek haba pawang pukat
Lon sarikap haba bunoe

Jinoe Nabi lon riwayat
Neumeung hajat woe u nanggroe
Ka neupeugah ubak tuan
Lon hajatkan woe u nanggroe

Judo lon nyoe lon ba sajan
U nanggroe Syam ulon kuwoe
Lon baroekon tan neuturi
Rasul Rabbi ulon teuh nyoe

Nyang baroekon sangat keuji
Buet jen asi tipee kamoe
Ngon kuasa sidroe Rabbi
Keumbali hareuta kamoe

Raya gaseh nibak mawang
Dua sajan ayah kamoe
Padum rugoe ngon hareuta
Keubeulanja ulon teuh nyoe

Tapeuidin dua gata
Lon ku gisa woe u nanggroe
Bak masa nyan dalem pawang
Keudukaan hana bagoe

Rhet ie mata meugeulumbang
That neusayang meulintee droe
Teungoh galak ngon neusayang
Neumeung riwang le u nanggroe

Supo hate nyang han bimbang
Sang-sang badan luroh asoe
Pawang geumoe kon bubarang
Ie mata ban hujeuen baroe

Teutap pawang dalam deundam
Po jonjongan lon hareutoe
Laju neuhei angen rakhan
Lam sijuem klam le ka sampoe

Jibet sigala tandra
Dalam hawa jipo jinoe
Jiangkot bandum lasyeuka
Sikleb mata peujam nanggroe

Nabi ka troh u nanggroe Syam
Seumanyam nibak teumpat droe
Rakyat ireng kiri kanan
Padum juhan deungon meuntroe

Nabi kalon dalam kawan
Raja seetan nyang saboh roe
Astarukhi aneuk jalang
Peue sabab tan aneuk bisoe

Nabi hei le jen meukawan
Seutot rijang aneuk bisoe
Ubak jen neuyue jak cari
Jiseutot le jeueb-jeueb sagoe

Lam-lam paya habeh jilob
Troph u laot keunan sampoe
Jeueb-jeueb gunong nyang na anggob
Habeh jilob dum sinaroe

Tan jiteumee Astarukhi
Woe bak Nabi jijak kheun proe
Neupeurintah lom le Nabi
Ubak asi nyang saboh roe

Nyang jeuet gamba raja Anggor
Neuyue lalu le ban peuet droe
Nyang peusisat putroe ijo
Nyang peuba-e keu ayah droe

Jeuet peuet droe laju peureugi
Jijak cari jeueb-jeueb sagoe
Teuma jiteumee Astarukhi
Ubak Nabi ka jipuwoe

Meung hadap laju ngon Nabi
Neuyue rante gaki jaroe
Neuyue seksa peuet ploh hari
Keureuna Nabi jipeupaloe

Jih nyang duek diateueh tahta
Neubri bala peuet ploh uroe
Teuma dudoe neukeulua
Neupareksa laju keudroe

Neutanyong le Nabiullah
Cuba peugah aneuk bisoe
Hai mala'un laknatullah
Na keukai kah lon keugantoe

Cuba kakheun bak lon beudraih
Mangat leupah bak bala nyoe
Astarukhi laju peugah
Jibet pantaih dua jaroe

Ulon pubuet atueuh Nabi
Tan gob tukri pi meung sidroe
Meungka na ureueng keutahui
Lon beuranti kujak boh droe

Nibak tahta han lon duek le
Kujak Rabbi laen bagoe
Nabi deungo jikheun meunan
Neuyue ploh nyan aneuk bisoe

Neupeumeuah le jonjongan
Sabab kalam teupat tuloe
Astarukhi bak masa nyan
Bungong tangan jijok jinoe

Keureuna jih raya deesya
Teuma jiba bungong jaroe
Na saboh ceureumen kaca
Keu anbia jijok keudroe

Nabi sambot laju sigra
Leumah nyata neueu nanggroe
Deuh neukalon jeueb-jeueb donya
Ajab raya ceureumen nyoe

Nabi Sulaiman hate suka
Deuh donya sigala nanggroe
Beuthat jarak toe di mata
Dalam cahya ceureumen nyoe

Asoe laot asoe darat
Neutupat le Nabi sidroe
Teuma Nabi tanyong leugat
Bak kah kitab raja pindoe

Ho ka kitab raja Anggor
Padum na le kaba keunoe
Kitab sihe bak kah that le
Sinan tuto le nyang paloe

Teuma jijok sama sikali
Ubak Nabi dum sinaroe
Ka neuyue boh uleh Nabi
Kabuni u dalam sungoe

Jitiek lam ie sama sikali
U pasi hanyot sinaroe
Sinan asai kitab sihe
Ie pi ile jeueb-jeueb nanggroe

Hingga hanyot sigala be
Ka ile sigala nanggroe
Le hanyot u nanggroe wastan
Bak ie buang jeueb-jeueb sagoe

Teuma jingui uleh insan
Macam-macam jipeugot droe
Le that kaom cit nyang khadam
Jimeuiman bak sihe nyoe

Haba kitab oh nan diyam
Ka lheueh buang yoh saboh roe
Ubak Nabi lom meuriwang
Nabi Sulaiman neuhadap droe

Ya Tuhanku lon han troh pham
Keurajaan ulon sidroe
Sigohlom lon keurjakan
Soe na peugang lagee lon nyoe

Oh watee ulon keurajaan
Akhe datang teuma keusoe
Haba lon bukan keu deungki
Kon han lon bri keu beuranggasoe

Bukon meunan hai ya Rabbi
Nyang keutahui gata sidroe
Fireuman Tuhan bak Jibra-i
Jawueb geubri meunoe bagoe

Buet nyang meunan cit keu gata
Laen hana beuranggasoe
Teutapi takira-kira
Tapeulara malam uroe

Meunyo cit got tapeulara
Lagee nyang ka meunan bagoe
Meunyo han tatem keurija
Mungkar gata deesya dudoe

Hai Sulaiman beutatuban
Keurajaan nyang kubri nyoe
Gata taeu beurangkajan
Keureuna iman meujak muwoe

Sigala buet Tuhan seurahkan
Bek ingkaran jeuet keu rugoe
Sigala buet Tuhan seurahkan
Jeueb alam keu gata sidroe

Gata luput barangkajan
Daya seetan dum sinaroe
Dumna nekmat nyan keu gata
Takuasa atueh bumoe

Sigala jen tkuasa
Ngon karonya Tuhan sidroe
Masa dilee ayah gata
Tan kuasa meunoe bagoe

Troh bak akhe saboh masa
Fatimah Dahra nyang sambinoe
Gaseh Tuhan nyan keu hamba
Geuberkata meunoe bagoe

Kheun Fatimah ubak ayah
Fireuman Allah ubak kamoe
Hai Muhammad Rasulullah
Ngo kupeugah beuta pakoe

Adat kon keureuna gata

Han kupeuna langet bumoe
Han kupeujeuet sigala rupa
Keureuna gata gaseh kamoe

Kupeuampon bandum deesya

Umat gata dum sinaroe

Fireuman Allah ubak Daud

Ngo kuseubot tango bunyoe

Hadap pocut bek peulikot

Buet nyang karot bek tapeutoe

Hai Daud peugot meuseujid

Tanoh nyang dhiet mita jinoe

Di Palestina sinan sabet

Jak peuhudep nyang lon kheun nyoe

Dua blaih ribee limong reutoh

Panyang taboh luah bumoe

Kira deupa ban siseun troh

Toe ngon jeuoh beusaban roe

Mita bumoe di Palestina

Pumulia dum sinaroe

Beusaboh po bumoe rata

Jak usaha pahla dudoe

Teumpat teebat umat dumna

Nyang bahgia hamba kamoe

Nabi Daud jak usaha

U Palestina ka neupeutoe

Nyang na sinan tanoh luah

Saboh Syaokan pojji sidroe

Nasuha po tanoh luah

Panyang sah dua peursagoe

Geuboh pageue ban seunlingka

Tanoh data jroh han bagoe

Nasuha nyan aneuk raja
Sangat kaya dilee proe
Nabi Daud keunan teuka
Bak Nasuha ka neupeutoe

Hai Nasuha tanoh gata
Bri keu hamba lon keu meung bloe
Bak ulon Fireuman Allah
Tanoh luah nyan geuyue bloe

Lon meung peugot nyan baitullah
Bak ziarah umat dudoe
Nasuha seuot le bagah
Insya Allah jeuet lon publoe

Teutapi meuhai sileupah
Bek tailah nyan keu kamoe
Han ek tabloe yum tanoh ulon
Habeh gampong gata sidroe

Habeh hareuta jeueb sagoe don
Yum tanoh lon han seuleusoe
Daud deungo haba meunan
Ka teurceungang hana bagoe

Tron Jibra-i yoh masa nyan
Tafireuman Tuhan sidroe
Hai Daud tabloe le gata
Bak hareuta meuploh katoe

Nasuha nyan aneuk raja
Peutroh pinta ban napsu droe
Tanyong Nabi le hareuga
Padum teuma kheun bak kamoe

Tanoh lon peuet ribee deupa
Buju sangka ban peuet sagoe
Peiduek meuh ato beurata
Nyan hareuga tanoh lon nyoe

Le deungon mit jeuet takira
Kureueng hana yum ka sampie
Teubai meuh sijeungkai beuna
Ateueh donya nyan tapasoe

Daud deungo kheun Nasuha
Bagi dua ek lon pasoe
Kon tanoh tabagi dua
Hareuga dumnan hareutoe

Kheun Nasuha kureueng hana
Siwang buta han jeuet keu rugoe
Jibra-i kheun yum weuek dua
Lagee gata masa bunoe

Daud kheun lom sibagian
Tajualan nyan keu kamoe
Nasuha iem seungab diyam
Daud riwang u rumoh droe

Umu lhee uroe teuma datang
Nasuha nyan jak peugah proe
Hai Daud khalifah Allah
Bit-bit sah tanoh lon publoe

Bayeue yum keunoe bubagah
Bahle murah ulon publoe
Kheun Daud peukureueng bacut
Bit that lanjot hareuga nyoe

Nasuha han le geuseuot
Geupeulikot laju geuwoe
Bak malam nyan di Nasuha
Leumah lanja dalam lumpoe

Sang-sang teunget sang-sang jaga
Daud gata leumah bak droe
Nyum Daud kheun bak Nasuha
Jok lanja nyoe meuh sinaroe

Peuet reutoh thon ka di gata

Tan keurija ube tumpoe

Suroh Tuhan han takira

Taboh laba tatueng rugoe

Boh jok meuh yum tanoh gata

Tanoh teuma keu lon sidroe

Meung han tatueng dalam donya

Tajok teuma uroel dudoe

Tajok teuma u akherat

Laba le that gata sidroe

Deesya gata dalam donya

Dum simua hapus keudroe

Padum-padum umu gata

Bandum deesya ek seuleusoe

Meunan leumah bak Nasuha

Meuh ka rata bak tanoh nyoe

Dalam pike ho simua

Nasuha teupike keudroe

Keupeue le meuh ho kumeung ba

Kee nyoe pana kubri keu soe

Walee kubri keu seedara

Peue keu laba keu ulon nyoe

Meuh teuma roh gop po areuta

Kee lam donya cit geupasoe

Kee jipeulob dalam kubu

Meuh nyang got hu ka gob puwoe

Nasuha kheun yoh nyan laju

Ya Tu Hanku po da kamoe

Tanoh lon nyoe ube nyang na

Ubak gata lon srah jinoe

Neupeujeuet keu tanoh syurga

Pinta hamba bak po kamoe

Meunan neukheun le Nasuha
Allah taala kabui dudoe
Nasuha pi laloe jaga
Beudoh sigra beungoh uroe

Ubak Daud geupeureugi
Neupeugah kri haba baroe
Tanoh lon sama sikali
Ka ulon bri kon lon publoe

Yum tanoh lon ka Tuhan bri
Ini hari ka seuleusoe
Nasuha teuma keumbali
Tinggai Nabi laju neuwoe

Troh u rumoh neuibadat
Han le hajat nikmat bunoe
Hana sapeue le teuringat
Dalam taat geunap uroe

Bak masa nyan tron le ayat
Kheun hadarat po geutanyoe
Neupeugah ubak Muhammad
Ibadat Nasuha sidroe

Yaa ayyuhal lazina amanu
Tubu ilallah taubatan Nasuha
Saboh kaol na geuseubot
Nabi Daud geupeuhaba

Habeh hareuta dum sinaroe
Masa neubloe tanoh Nasuha
Sang-sang han ek le geupasoe
Neungadu droe bak Rabbana

Daud neukheun ubak Tuhan
Gata tuban dum peukara
Lon pubuet saboh bakeuti
Hingga datang akhe masa

Dipuphon bak lon bak aneuk lon
Turon muron cuco hamba
Neuteurimong ban pinta lon
Neupeulindong dua donya

Daud peugot le meuseujid
Neupeuteubiet le hareuta
Bandum hareuta hana neukriet
Le deungon mit hana neukira

Meuseujid lheueh droeneuh wafeuet
Meusalen jeuet bak aneukda
Nabi Sulaiman tamah lom sifeuet
Leubeh mureued nibak nyang ka

Sulaiman turab deungon batee
Meuploh ribee uang keulua
Pinto peuet boh neupeuteuntee
Maseng lagee neuboh nama

Saboh pinto teumpat teubat
Ampo meuhat bandum deesya
Nyang keudua pinto rahmat
Cit geusurat geuboh nama

Pinto nyang lhee bab seulamat
Keueumpat pinto seujahtra
Panyang tameh bak ukuran
Peuet boh tiang teumpat bara

Batee yakut dum geupasang
Batee nilam jroh wareuna
Nabi Sulaiman nyang yue tuang
Lua dalam geuboh peulita

Batee pirak dum geugantung
Geulheueng-lheueng ngon batee marma
Anteng-anteng jeueb-jeueb rueueng
Geugantung panyot dum rata

Geuyue peugot ngon saloran
Bak ie jalan ban seulingka
Geuyue jaga uroe malam
Bek kotoran ban seulingka

Lom geupeugot saboh kubah
Lhee reutoh bah panyangjih na
Kitab Taurit sinan geukeubah
Masya Allah fireuman Esa

Deungon Zabur sinan sapat
Watee hajat geujak mita
Ngon rihai meuh ka lheueh geucat
Jroh that leungkap dum sineuna

Buet pih teulheueh Nabi Sulaiman
Beurjalan teumpat mulia
Droeneuh ka troh janji Tuhan
Habeh keurajaan dalam donya

Bak meuseujid baro leungkap
Neumeuhajat seumbah Esa
Ie seumbahyang na bak jasad
Sang ka lambat syokneuh teuka

Neujak tueng keumeung seubaro
Nabi lalu keunan lanja
Lheueh neutueng ie neuwoe laju
Troph u leupu rab ngon tahta

Nabi neudong sinan siat
Teumpat tungkat nyan saidina
Izrail keunan troh leugat
Meungadap deungon saidina

Geutueng nyawong Nabiullah
Habeh langkah dalam donya
Tan jituhu le hamba Allah
Han reubah Nabi mulia

Teudong cot sinan beurdiri
Keuheundak Rabbi han soe sangga
Tan soe tupeue wafeuet Nabi
Kanan kiri ureueng jaga

Ureueng ngadap uroe malam
Han jituban nyan anbia
Bandum raja sikalian
Meungsidroe tan tupeue basa

Fireuman Allah ubak kamoe
Neuyue kawai tungkat saidina
Umu sithon tan soe tupeue
Nyan keuh kamoe nyang peunyata

Phon bak gaki jikap tungkat
Patah leugat reubah sigra
Reubah Nabi sinan leugat
Beudoh sahbat dum simua

Meuhimpoh bandum jipeurap
Jieu pucat wareuna muka
Jipeurati teuma leugat
Han le hayat nyang mulia

Meuri beukaih cit ka treb that
Buet hadarat han soe thee ka
Teungoh gadoh bandum rakyat
Jingadap Nabi mulia

Teuma teuka angen rakhan
Jonjongan jiangkot sigra
Jipupo laju lam awan
Hingga datang saboh donya

Tujoh donya jijeumeurang
Leunyap hilang han meuho ka
Makhluk donya dum salindan
Jonjongan ka angen bawa

Bak masa nyan subra alam
Inong agam rioh donya
Nabi gadoh dalam awan
Beurtangisan rakyat dumna

Tinggai aneuk sidroe agam
Geuboh nan Nabi Armia
Tinggai putroe ngon deundayang
Seulindan bandum simua

Tujoh reutoh peurumoh Nabi
Oh noe hat cre ngon anbia
Putoh rahmat nibak Rabbi
Keu isteuri Nabi mulia

Kakeuh tamat haba Sulaiman
Oh noe diam ka seumpureuna
Kakeuh habeh ulon surat
Uroe ahad ka seumpureuna

Deungon tulong Allah ahad
Troh ban hajat faki hina
Hana sapeu jeuet rintangan
Ngon doa nyan dum simua

Hai syeedara nyang budiman
Doa bek han oh tabaca
Oh tabaca tahoreumat
Tangadap haba anbia

Beuget tapham bek na silab
Tueng ibarat ngon seumpeuna
Oh tabaca taniet tabeuet
Tueng meukeusud nyang seumpureuna

Raya pahla takheun nubuet
Ngon seulaweuet sajan taba
Tapeurati buet Sulaiman
Pakri ban nyan geukeurija

Peue meunalah nibak Tuhan
Keureuna gob nyan takzim raya
That neutakot nyan keu Tuhan
Nyan balasan bak Rabbana

Balah takot nyan keu Tuhan
Neubri alam neuyue kuasa
Neupulang jen deungon insan
Lom hayawan margasatwa

Troh bak sidom dalam bumoe
Kuasa nyoe Sulaiman raja
Beutapateh dum sinaroe
Agam binoe tuha muda

Hana dusta nyang haba nyoe
Kon neurampoe cit ube na
Kon teupeugah keu carong droe
Ube na nyoe lam calitra

Haba Nabi cit ka saheh
That leubeh sigala-gala
Mukijat ka awai teupreh
Soe nyang cukeh dum binasa

Bak nur kon pangkat ka leubeh
Han jeuet teupeh bak Rabbana
Soe beurani keumeung cukeh
Bijeh-bijeh cit binasa

Kakeuh tamat haba Sulaiman
Jonjongan nyang that mulia
Amin Ya Allah Amin Ya Rahman Amin Ya Mannan
Amin Ya Salam Amin Ya Raqib Amin Ya Qarib
Amin Ya Mujib Amin Ya Hakim
Allahummag fir lana wa liwalidina
Wa limasyaikhina fiddini wa lisairil mukminina
Wal mukminati wal muslimina wal muslimati
Birahmatika Ya Arhamar Rahimin



PN BALAI PUSTAKA — JAKARTA

